




陸奥衡集全

十

柳田文庫
文庫11
D 127



晉

文庫 11
D 127

陸士衡文集目錄

卷之一

賦

文賦 并序

感時賦

豪士賦 并序

瓜賦

思親賦

卷之二

陸士衡文集目錄



010190553111

賦

遂志賦 并序

懷士賦 并序

行思賦

思歸賦 并序

愍思賦

應嘉賦

卷之三

賦

幽人賦

列仙賦

凌霄賦

述思賦

歎逝賦 并序

大暮賦 并序

感丘賦

卷之四

賦

陸士衡集卷之五

浮雲賦

白雲賦

鼓吹賦

漏刻賦

羽扇賦

鼈賦 并序

桑賦 并序

卷之五

詩

皇太子宴宣猷堂有令賦詩

皇太子賜讌

春詠

遨遊出西城

赴洛二首

赴洛道中二首

招隱二首

園葵

於承明作與士龍

陸士衡集卷之五

三

陸二傳集卷之六目錄
吳王郎中時從梁陳作

贈馮文罷遷斥丘令

荅賈謐 并序

贈尚書郎顧彥先

贈顧交趾公貞

贈從兄車騎

荅張士然

贈馮文罷

贈弟士龍

祖道異雍孫劉道邊仲潘正叔

荅潘尼

贈潘尼

贈紀士

為陸思遠婦作

為顧彥先贈婦

卷之六

擬古十二首

行行重行行

今日良宴會

迢迢牽牛星

涉江采芙蓉

青青河畔草

明月何皎皎

蘭若生朝陽

青青陵上栢

東城一何高

西北有高樓

庭中有奇樹

明月皎夜光

樂府十七首

猛虎行

君子行

從軍行

豫章行

苦寒行

飲馬長城窟行

門有車馬客行

君子有所思行

齊謳行

日出東南隅行

長安有狹邪行

前緩聲歌

長歌行

吳趨行

塘上行

悲哉行

短歌行

卷之七

樂府十首

折楊柳

鞠歌行雜言

當置酒

健行怨

燕歌行

悲哉行

梁甫吟

董桃行

桃一作逃董卓時童謠名

月重輪行

日重光行

挽歌三首

百年歌十首

秋胡行

順東西門行

上留田行

隴西行

駕言出北闕行

太山吟

權歌行

東武行吟

飲酒樂

卷之八

雜著

演連珠五十首

七徵一首

卷之九

頌

漢高祖功臣頌

箴

丞相箴

贊

孔子贊

王子喬贊

牋

至洛與成都王牋

表

謝平原內史表

文

吊魏武文

吊蔡邕文

誄

吊吳大帝誄

愍懷太子誄

吳貞獻處士陸君誄

吊丞相江陵侯陸公誄

吳大司馬陸公誄

晉劉處士參妻王氏夫人誄

辭

吳大司馬陸公少女哀辭

卷之十

議

大田議

論

辨亡論上

辨亡論下

五等諸侯論

碑銘

平西將軍孝侯周處碑

陸士衡集

卷第一

陸士衡集卷第一

晉 吳郡陸 機著

明 新安汪士賢校

文賦 并序

余每觀才士之所作竊有以得其用心夫其放言遣辭良多變矣妍蚩好惡可得而言每自屬文尤見其情怛患意不稱物文不逮意蓋非知之難能之難也故作文賦以述先士之盛藻因論作文之利害所由他日殆可謂曲盡其妙至於操斧伐柯雖取則不遠



陸士衡集卷一
若夫隨手之變良難以辭逮蓋所能言者具於此云
爾

佇中區以玄覽願情志於典墳遵四時以歎逝瞻萬
物而思紛悲落葉於勁秋喜柔條於芳春心懍懍以
懷霜志眇眇而臨雲誅世德之駿烈誦先人之清芬
游文章之林府嘉麗藻之彬彬慨投篇而援筆聊宣
之乎斯文其始也皆收視反聽耽思傍訊精鶩八極
心游萬仞其致也情曠曠而彌鮮物昭晰而互進傾
羣言之瀝液漱六藝之芳潤浮天淵以安流濯下泉

而潛浸於是沈辭怫悅若游魚銜鈎而出重淵之深
浮藻聯翩若翰鳥纓繳而墜層雲之峻收百世之闕
文採千載之遺韻謝朝華於已披啟夕秀於未振觀
古今於須臾撫四海於一瞬然後選義按部考辭就
班抱景者咸叩懷響者必彈或因枝以振葉或沿波
而討源或本隱以之顯或求易而得難或虎變而獸
擾或龍見而鳥瀾或妥帖而易施或岨嶸而不安罄
澄心以凝思眇衆慮而爲言籠天地於形內挫萬物
於筆端始躑躅於燥吻終流離於濡翰理扶質以立

翰文壘條而結繁信情貌之不差故每變而在顏思
涉樂其必笑方言哀而已歎或操觚以率爾或含毫
而邈然伊茲事之可樂固聖賢之所欽課虛無以責
有叩寂寞而求音函緜邈於尺素吐滂沛乎寸心言
恢之而彌廣思按之而愈深播芳蕤之馥馥發青條
之森森粲風飛而焱豎鬱雲起乎翰林體有萬殊物
無一量紛紜揮霍形難爲狀辭程才以効伎意司契
而爲匠在有無而僂俛當淺深而不讓雖離方而遯
照期窮形而盡相故夫誇目者尚奢愜心者貴當言

窮者無隘論達者唯曠詩綠情而綺靡賦體物而瀏
亮碑披文以相質誄纏緜而悽愴銘博約而溫潤箴
頓挫而清壯頌優游以彬蔚論精微而朗暢奏平徹
以閑雅說煒燁而譎誑雖區分之在茲亦禁邪而制
放要辭達而理舉故無取乎冗長其爲物也多姿其
爲體也屢遷其會意也尚巧其人言也貴妍暨音聲
之迭代若五色之相宣雖逝止之無常固崎嶇之難
便苟達變而識次猶開流以納泉如失機而後會常
操末以續巔謬玄黃之秩叙故渙浚而不鮮或仰逼

陸士衡集卷一
於先條或俯侵於後章或辭害而理比或言順而義妨離之則雙美合之則兩傷考殿最於錙銖定去留於毫芒苟銓衡之所裁固應繩其必當或文繁理富而意不指適極無兩全盡不可益立片言而居要乃一篇之警策雖衆辭之有條必待茲而效績亮功多而累寡故取足而不易或藻思綺合清標千眠炳若縟繡悽若繁絃必所擬之不殊乃閤合乎曩篇雖杼軸於予懷怵他人之我先苟傷廉而愆義亦雖愛而必捐或若發穎豎離衆絕致形不可逐
難爲係塊

孤立而特峙非常音之所緯心牢落而無偶意徘徊而不能掃石韞玉而山暉水懷珠而川媚彼榛楛之勿翦亦蒙榮於集翠綴下里於白雪吾亦濟夫所偉或託言於短韻對窮迹而孤興俯寂寞而無友仰寥廓而莫承譬偏絃之獨張含清唱而靡應或寄辭於瘁音言徒靡而弗華混妍蚩而成體累良質而爲瑕象下管之偏疾故雖應而不和或遺理以存異徒尋虛以逐微言寡情而鮮愛辭浮漂而不歸猶絃么而徽急故雖和而不悲或犇放以諧合務嘈噴而妖冶

徒悅目而偶俗固聲高而曲下寤防露與菜間又雖
悲而不雅或清虛以婉約每除煩而去濫闕大羨之
遺味同朱絃之清汜雖一唱而三嘆固旣雅而不豔
若夫豐約之裁俯仰之形因宜適變曲有微情或言
拙而喻巧或理朴而詞輕或襲故而彌新或汙濁而
更清或覽之而必察或研之而後精譬猶舞者赴節
以投袂歌者應絃而遣聲是蓋輪扁所不得言故亦
非華說之所能精普辭條與文律良余膺之所服練
世情之常允識前脩之所淑雖澹發於巧心或後吹

於拙目彼璫敷與玉藻若中原之有菽同橐籥之罔
窮與天地乎並育雖紛藹於此世嗟不盈於手掬患
挈銓之屢空病昌言之難屬故蹉跎於短韻放庸音
以足曲恒遺恨以終篇豈懷盈而自足懼蒙塵於叩
缶顧取笑乎鳴玉若夫感應之會通塞之紀來不可
遏去不可止藏若景滅行猶響起方天機之駿利夫
何紛而不理思風發於曾臆言泉流於唇齒紛葳蕤
以馭選唯毫素之所擬文徽徽以溢目音泠泠而盈
耳及其六情底滯志往神留兀若枯木豁若涸流攬

營魂以探賸頓精爽於自求理翳翳而愈伏思乙乙
其若抽是以或竭情而多悔或率意而寡尤雖茲物
之在我非余力之所勦故時撫空懷而自惋吾未識
夫開塞之所由伊茲文之爲用固衆理之所因恢萬
里而無閔通億載而爲津俯貽則於來葉仰觀象於
古人濟文武於將隊宣風聲於不泯塗無遠而不彌
理無微而弗綸配霑潤於雲雨象變化乎鬼神被金
石而德廣流管絃而日新

感時賦

悲夫冬之爲氣亦何憺慄以蕭索天悠悠其彌高霧
鬱鬱而四幕夜緜邈其難紆日晡晚而易落敷層雲
之歲鞋墜零雪之揮霍冰冽冽而寢興風漫漫而妄
作鳴枯條之泠泠飛落葉之漠漠山崆嶲以含瘁川
蜷蛇而抱涸望八極以曠漭普宇宙而寥廓伊天時
之方慘曷萬物之能歡魚微微而求偶獸岳岳而相
攢後長嘯於林杪鳥高鳴於雲端矧余情之含瘁恒
覩物而增酸歷四時之迭感悲此歲之已寒撫傷懷
以嗚咽望來路而汎瀾

豪士賦 并序

夫立德之基有常而建功之路不一何則循心以爲量者存乎我因物以成務者繫乎彼存夫我者隆殺止乎其域繫乎物者豐約唯所遭遇落葉俟微風以墮而風之力蓋寡孟嘗遭雍門以泣而琴之感以末何者欲墮之葉無所假烈風將墜之泣不足繁哀響也是故苟時啓於天理盡於民庸夫可以濟聖賢之功斗筭可以定烈士之業故曰才不半古而功已倍之蓋得之於時勢也歷觀古今徼一時之功而居伊

周之位者有矣夫我之自我智士猶嬰其累物之相物昆蟲皆有此情夫以自我之量而挾非常之勲神器暉其顧眄萬物隨其俯仰心玩居常之安耳飽從諛之說豈識乎功在身外任出才表者哉且好榮惡辱有生之所大期忌盈害上鬼神猶且不免人主操其常柄天下服其大節故曰天可讎乎而時有袷服荷戟立乎廟門之下援旗誓衆奮於阡陌之上况乎代主制命自下裁物者哉廣樹恩不足以敵怨勤興利不足以補害故曰代大匠斲者必傷其手且夫政

西漢書卷一
由甯氏忠臣所爲慷慨祭則寡人人主所不久堪是
以君與鞅鞅不悅公旦之舉高平師師側目博陸之
勢而成王不遣嫌吝於懷宣帝若負芒刺於背非其
然者歟嗟乎光于四表德莫富焉王曰叔父親莫昵
焉登帝天位功莫厚焉守節沒齒忠莫至焉而領側
顛沛僅而自全則伊生抱明允以嬰戮文子懷忠敬
而齒劍固其所也因斯以言大以篤聖穆親如渡之
懿大德至忠如此之盛尙不能取信於人主之懷止
謗於衆多之口過此以往惡覩其可安危之理斷可

識矣又况乎饗大名以冒道家之忌運短才而易聖
哲所難者哉身危由於勢過而不知去勢以求安禍
積起於寵盛而不知辭寵以招福見百姓之謀已則
申宮警守以崇不畜之威懼萬民之不服則嚴刑峻
制以賈傷心之怨然後威窮乎震王而怨行乎上下
衆心日侈危機將發而方偃仰瞪眄謂足以夸世笑
古人之未工忘已事之已拙知曩勲之可矜暗成夫
之有會是以事窮運盡必於顛什風起塵合而禍至
常酷也聖人忌功名之過已惡寵祿之踰量蓋爲此

國士衡集卷一
也夫惡欲之大端賢愚所共有而游于徇高位於生
前志士思壘名於身後受生之分唯此而已夫蓋世
之業名莫大焉震主之勢位莫盛焉率意無違欲莫
盛焉借使伊人頗覽天道知盡不可益盈難久持超
然自引高揖而退則巍巍之盛仰邈前賢洋洋之風
俯冠來籍而大欲不乏於身至樂無愆乎舊節彌効
而德彌廣身愈逸而名愈劭此之不爲彼之必昧然
後河海之跡堙爲窮流一簣之釁債成山岳名編凶
頑之條身厭荼毒之痛豈不謬哉故聊賦焉庶使百

世少有寤云

世有豪士兮遭國顛沛攝窮運之歸期當衆通之所
會苟時至而理盡譬摧枯而振敗因天地以運動恒
才瑣而功大於是禮極上典服盡暉崇儀北辰以葺
宇實蘭室而桂宮撫王衡而樞極運萬物乎掌中伊
天道之剛健猶時至而必保日罔中而弗曷月何盈
而不闕襲覆車之危軌笑前乘之未完若知險而退
止趨歸蕃而自戢推璇璣以長謝顧萬物而高揖訖
浮雲以邁志豈咎吝之能集擠爲山以自隕歎禍至

於何及

瓜賦

佳哉瓜之爲德邈衆果而莫賢殷中和之淳祐播滋
榮於甫田背芳春以初載迎朱夏而自延奮脩系之
莫邁延秀飈之綿綿赴廣武以長蔓粲煙接以雲連
感嘉時而促節蒙惠霑而增鮮若乃紛敷雜錯鬱悅
婆娑發彼適此迭相經過熙朗日以熠燿扇和風其
如波有葛藟之簞及相椒聊之衆多發金榮於秀翹
結玉實於柔柯蔽翠景以自育綴脩莖而星羅夫其

種族類數則有括樓定桃黃齠白傳金文密筍小青
大班玄斝素椀狸首虎蹠東陵出於秦谷桂髓起於
巫山五色比象殊形異端或濟貌以表內或惠心而
醜顏或攄文而抱綠或披素而懷丹氣洪細而俱芬
體脩短而必圓芳郁烈其充堂味窮理而不餽德弘
濟於飢渴道殷流而貴賤若夫濯以寒水淬以夏凌
越氣外斂溫液密凝體猶握虛離若剖冰

思親賦

悲桑梓之悠曠愧蒸嘗之弗營指南雲以寄欽望歸

風而効誠年歲俄其聿暮明星爛而將清迴飈蕭以
長赴零雪紛其下積羨纖枝之在榦悼落葉之去枝
存顧復之遺志感明發之所懷居辭安而厭苦養引
約而摧豐忘天命之晚暮願鞠子之速融兄瓊芳而
蕙茂弟蘭發而玉暉感瑰姿之晚就痛慈景之先違
天步悠長人道短矣異途同歸無早晚矣

陸士衡集卷第一

陸士衡集卷第二

晉 吳郡陸 機著

明 新安汪士賢校

遂志賦 并序

昔崔篆作詩以明道述志而馮衍又作顯志賦班固
作幽通賦皆相依倣焉張衡思玄蔡邕玄表張叔哀
系此前世之可得言者也崔氏簡而有情顯志壯而
泛濫哀系俗而時靡玄表雅而微素思玄精練而和
惠欲麗前人而優游清典漏幽通矣班生彬彬切而

不絞哀而不怨矣崔蔡冲虛温敏雅人之屬也行抑揚頓挫怨之徒也豈亦窮達異事而聲爲情變乎余備托作者之末聊復用心焉

武定鼎於洛汭胡受瑞於汝墳繇鳴鳳於百祀啓敬仲平方震苟天光之所照豈舜族之必陳厭禋祀於故墟饗禴祭於東鄰禰八葉而松茂舞九韶乎降神系姜叟於海曲表滄流於遠震仰前蹤之緜邈豈孤人之能胄匪世祿之敢懷傷茲堂之不構理或睽而後合道有夷而弗順傳栖崑而神交伊荷鼎以自進

蕭綱繆於豐沛故攀龍而先躍陳顛委於楚魏亦凌霄以自濯伍被刑而伏劍魏和戎而擁樂彼殊塗而並致此同川而偏溺禍無景而易逢福有時而難學惟萬物之運動雖紛糾而相襲隨性類以曲成故圓行而方立要信心而委命援前脩以自程擬遺跡於成軌詠新曲於故聲任窮達以逝止亦進仕而退耕庶斯言之不渝抱耿介以成名

懷土賦

并序

余去家漸久懷土彌篤方思之殷何物不感曲街委

巷罔不興詠水泉草木咸足悲焉故述斯賦
昔故都之沃衍適新邑之丘墟遵黃川以葺宇被蒼
林而卜居悼孤生之已晏恨親沒之何速排虛房而
求念想遺塵其如王眇絲邈而莫覲徒佇立其焉屬
感亡景於存沒惋隕年於拱木悲顧盼而有餘思俯
仰而自足留茲情於江介寄瘁貌於河曲玩通川以
悠想撫征轡而躑躅伊命駕之徒勤慘歸途之良難
愍栖鳥於南枝吊離禽於飴苾緯蕭艾其如蘭神何
寢而不夢形何興而不言

行思賦

背洛浦之遙遙浮黃川之裔裔遵河曲以悠遠觀通
流之所會啟石門而東縈汾汴渠其如帶託飄風之
習習冒沉雲之藹藹商秋肅其發節玄雲霈而垂陰
涼風淒其薄體零雨鬱而下淫覩川禽之遵渚看山
鳥之歸林揮清波以濯羽藏綠葉而弄音行彌久而
情勞途愈近而思深羨品物以獨感悲綢繆而在心
嗟逝官之未久年荏苒而歷茲越河山而託景眇四
載而遠期孰歸寧之弗樂獨抱感而弗怡

思歸賦 并序

余以元康六年冬取急歸而王師外征職典中兵與
 聞軍政懼兵革未息宿願有違懷歸之思憤而成篇
 節運代序四時相推寒風肅殺白露霑衣嗟行邁之
 彌留感時逝而懷悲彼離思之在人恒戚戚而無歡
 悲緣情以自誘憂觸物而生端晝輟食而發憤宵假
 寐而興言羨歸鴻以矯首挹谷風而如蘭歲靡靡而
 薄暮心悠悠而增楚風霏霏而入室響泠泠而愁予
 既遨遊乎川汜亦改駕乎山林伊我思之沉鬱愴感
 物而增深歎隨風而上逝涕承纓而下尋冀王事之
 暇豫庶歸寧之有時候涼風而警策指孟冬而為期
 願靈暉之促景恒立表以望之

愍思賦 并序

予屢抱孔懷之痛而奄復喪同生姊銜恤哀傷一載
 之間而喪制便過故作此賦以紆慘惻之感
 時方至其倏忽歲既去其晷晚樂來日之有繼傷頽
 年之莫纂覽萬物以澄念怨伯姊之已遠尋遺塵之
 思長瞻日月之何短升降乎階際顧盼兮屏營雲承

宇兮藹藹風入室兮泠泠僕從爲我悲孤鳥爲我鳴

應嘉賦 并序

友人有作嘉遁賦與余者作賦應之號曰應嘉云

傲世公子體逸懷遐意邈澄霄神夷靜波仰群軌以
遙企頓駿羽以婆娑寄冲氣於大象解心累於世羅
襲三閭之竒服詠南榮之清歌濯下泉於浚澗沂凱
風於卷阿指千秋以厲響俟寂寞之來和懷前脩之
彷彿覲幽人乎所過抱玄景以獨寐含清風而寤語
發蘭音以清唱搯王懷而喻予於是葺宇中陵築室
河曲軌絕千途而門瞻百族假妙道以達觀考貴龜
而貞卜苟形骸之可忘豈投簪其必谷方介丘於尺
阜託雲林乎一木佇鳴條以招風聆哀音其如玉窮
覽物以盡齒將弭迹於餘足

陸士衡集卷第二



陸士衡集卷第三

晉 吳郡陸 機著

明 新安汪士賢校

幽人賦

世有幽人漁釣乎玄渚彈雲冕以辭世披霄褐而延
佇是以物外莫得窺其奧舉世不足揚其波勁秋不
能雕其葉芳春不能發其華超塵冥以絕緒豈世網
之能加

列僊賦

夫何列僊玄妙超攝生乎世表因自然以爲基仰造化而聞道性冲虛以易足年緬邈其難老爾乃呼翕九陽抱一含元引新吐故雲飲露食違品物以長眇妙羣生而爲言爾其嘉會之仇息宴遊栖則昌客弄玉洛宓江妃觀百化於神區覲天皇於紫微過太華以息駕越流沙而來歸

凌霄賦

挾至道之容微狹流俗之紛沮颺余節以遠模風扶搖而相予削陋跡於分丘省遊僊而投軌凱情累以

望沙谷以企予惜此景之屢戢悲夫川閱水以成川水滔滔而日度世閱人而爲世人冉冉而行暮人何世而弗新世何人之能故野每春其必華草無朝而遺露經終古而常然率品物其如素譬日及之在條恒雖盡而不寤雖不寤而可悲心惆焉而自傷亮造化之若茲吾安取夫久長痛靈根之夙殞怨具爾之多喪悼堂構之頽瘁愍城闕之丘荒親彌懿其已逝交何戚而不亡咨余命之方殆何視天之茫茫傷懷悽其多念感貌瘁而鮮歡幽情發而成猪滯思叩而

興端慘此世之無樂詠在昔而爲言居充堂而衍宇
行連駕而比軒彌年時其詎幾夫何往而不殘或冥
邈而旣盡或寥廓而僅半信松茂而栢悅嗟芝焚而
蕙歎苟性命之弗殊豈同波而異瀾瞻前軌之旣覆
知此路之良難啓四體之深悼懼茲形之將然毒娛
情之寡方怨感目之多顏諒多顏之感目神何適而
獲怡尋平生於響像覽前物而懷之步寒林以悽惻
翫春翹而有思觸萬物以生悲歎同節而異時年彌
往而念廣塗薄暮而意迕親落落而日稀友靡靡而
遂濟豈時俗之云阻判煙雲之騰躍半天步而無旅
詠凌霄之飄飄未終焉而弗悔昊蒼煥而運流日月
翻其代序下霄房之靡迄卜良晨而復舉陟瑤臺以
投轡步王除而容與

述思賦

情易感於已攬思難戢於未忘嗟伊思之且爾夫何
往而弗臧駭中心於同氣分戚見於異方寒鳥悲而
饒音衰林愁而寡色嗟余情之屢傷負大悲之無力
苟彼塗之信險恐此日之行吳亮相見之幾何又離

居而別域觀尺景以傷悲撫寸心而悽惻

歎逝賦 并序

昔每聞長老追諗平生同時親故或彫落已盡或僅有存者余年方四十而懿親戚屬亡多存寡暱交密友亦不半在或所曾共遊一塗同宴一室十年之內索然已盡以是思哀哀可知矣乃爲賦曰

伊天地之運流紛升降而相襲日望空以駿驅節循虛而警立嗟人生之短期孰長年之能執時飄忽其不再老晚晚其將及對瓊蕊之無徵恨朝霞之難挹

愈索顧舊要於遺存得十一於千百樂墮心其如忘哀緣情而來宅託末契於後生余將老而爲客然後弭節安懷妙思天造精浮神淪忽在世表寤大暮之同寐何矜晚以怨早指彼日之方除豈茲情之足攬感秋華於衰木萍零露於豐草在殷憂而弗違夫何云乎識道將頤天地之大德遺聖人之洪寶解心累於末迹聊優游以娛老

大暮賦 并序

夫死生是得失之大者故樂莫甚焉哀莫深焉使死

而有知乎安知其不如生如遂無知耶又何生之足戀故極言其哀而終之以達庶以開夫近俗云

夫何天地之遼闊而人生之不可久長日引月而並隕時維歲而俱喪知自壯而得老體自老而得亡顧黃墟之杳杳悲泉路之翳翳挫千乘猶一毫當何數乎智慧徒假願於須臾指夕景而爲誓忽呼吸而不振奄神徂而形斃顧萬物而遺恨收百慮而長逝於是六親雲起姻族如林爭塗淹淚望門舉音敷幄席以悠想陳備物而虞靈仰寥廓而無見俯寂寞而無聲肴饌饒其不毀酒湛湛而每盈屯送客於山足伏甍道而哭之扃幽戶以大畢訢玄闕而長辭歸無塗兮往不反年彌去兮逝彌遠彌遠兮日隔無塗兮曷因庭樹兮葉落暮草兮根陳

感丘賦

泛輕舟於西川背京室而電飛遵伊洛之坻渚沿黃河之曲湄覩墟墓於山梁託崇山以自綏見兆域之藹藹羅魁封之纍纍於是徘徊洛涯弭節河干佇眈留心慨爾遺歎仰終古以遠念窮萬緒乎其端伊人

生之寄世猶水草乎山河應甄陶以歲改順通川面
日過爾乃申舟人以遂往橫大川而有悲傷年命之
倏忽怨天步之不幾雖履信而思順曾何足以保茲
普天塘其弗免寧吾人之所辭願靈根之晚墜指歲
暮而為期

陸士衡集卷第三

陸士衡集卷第四

晉 吳郡陸 機著

明 新安汪士賢校

浮雲賦

有輕虛之艷象無實體之真形厚厥本初浮沉混并
六律籥應八風時邁玄陰觸石甘澤霽霈勢不崇朝
露彼無外若層臺高觀重樓疊閣或如鐘首之鬱律
乍似寒門之寥廓金柯分玉葉散綠翹明崑英煥鸞
翔鳳翥鴻驚鶴奮鯨鯢泝波鮫鱓衝道朱絲亂紀羅

桂失領飛僊凌虛隨風遊聘有若芙蓉羣披薜華總會車渠統理瑪瑙縵文

白雲賦

攄神景於八幽合洪化乎烟熅充宇宙以播象協元氣而齊勳發憤靈石擢性洪流興曜曾泉升跡融丘盈八紘以餘憤雖彌天其未泄豈假期於遷晷遇崇朝而倏忽紅葉發而齒蒼金翹援而合葩神收鬼化弼性違序鳥殊類而比栖獸異跡而同處蛟引翳而並潛龍攀鴻而雙舉鸞舞角以軒罷鷲企翮而延佇

長城曲蜿采閣相扶聳瑤臺之截薛構瓊闥之離婁雄虹矯而垂天翠鳥軒而扶日

鼓吹賦

原鼓吹之攸始蓋稟命於黃軒播威靈於茲樂亮聖器而成文騁逸氣而憤壯繞煩手乎曲折舒飄颻以遐洞卷徘徊其如結及其悲唱流音彷徨依違合歡嚼弄乍數乍稀音躑躅於唇吻舌將舒而復迴鼓砢砢以輕投簫嘈嘈而微音詠悲翁之流思怨高臺之難臨顧穹谷以含哀仰歸雲而落音節應氣以舒卷

陸士衡集 卷四
響隨風而浮沉馬頓跡而增鳴士嘖蹙而雷襟若乃
巡郊澤戲野垆奏君馬詠南城慘巫山之遐險歡芳
樹之可榮

漏刻賦

偉聖人之制噐妙萬物而爲基形罔隆而弗包理何
遠而不之寸管俯而陰陽效其誠尺表仰而日月與
之期玄鳥懸而八風以情應王衡立而天地不能欺
旣窮神以盡化又設漏以考時爾乃挈金壺以南羅
藏幽水而北戢擬洪殺於編鍾順卑高而爲級激懸

泉以遠射跨飛途而遙集伏陰蟲以承波吞恒流其
如挹是故來象神造去猶鬼幻因勢相引乘靈自薦
口納胸吐水無滯咽形微獨靈之緒逝若垂天之電
偕四時以合最指昏明乎無殿籠八極於千分度晝
夜乎一箭抱百刻以駿浮仰胡人而利見夫其立體
也簡而効績也誠其假物也粗而致用也精積水不
過一鐘導流不過一筵而用天者因其敏分地者賴
其平徵聽者假其察貞觀者借其明考計歷之潛慮
測日月之幽情信探賸之妙術雖無神其若靈

羽扇賦

昔楚襄王會於章臺之上山西與河右諸侯在焉大
夫宋玉唐勒侍皆操白鶴之羽以爲扇諸侯掩塵尾
而笑襄王不悅宋玉趨而進曰敢問諸侯何笑昔者
武王玄覽造扇於前而五明安衆世繫於後各有託
於方圓蓋受則於筵甫舍茲器而不用顧奚取於鳥
羽宋玉曰夫創始者恒樸而飭終者必妍是故烹飪
起於熟石王輅基於推輪安衆方而氣散五明圓而
風煩未若茲羽之爲麗固體俊而用鮮彼凌霄之偉

鳥播鮮輝之萋萋隱九臯以鳳鳴游芳田而龍見醜
靈龜而遠期超長年而久眄累懷璧於美羽挫千載
乎一箭委曲體以受制奏雙翅而爲扇則其布翮也
差洪細秩長短稠不逼稀不簡於是鏤巨獸之齒裁
竒木之榦移圓根於正體因天秩乎舊貫鳥不能別
其是非人莫敢分其真贗翩翩姍姍以微振風飄飄以
垂婉妙自然以爲言故不積而能散其執手也安其
應物也誠其招風也利其播氣也平混貴賤而一節
風無往而不清憲靈樸於造化審真則而妙觀諸侯

曰善宋王遂言曰伊茲羽之駿敏似南箕之啟扉垂
皓曜之奕奕含鮮風之微微襄王仰而拊節諸侯伏
而引非皆委扇於楚庭執鳥羽而言歸屬唐勒而為
之辭曰

伊鮮禽之令羽夫何翩翩與眇眇反寒暑於一掌之
末迴八風乎六翮之杪

鰲賦 并序

皇太子幸于釣臺漁人獻鰲命侍臣作賦

其狀也穹脊連脅玄甲四周遁方圓於規矩徒廣狹

以妨循盈尺而脚寸又取具於指掌鼻嘗氣而忌脂
耳無聽而受響是以栖居多逼出處寡便尾不副首
足不運身於是從容澤畔肆志汪洋朝戲蘭渚夕息
中塘越高波以燕逸竄洪流而潛藏咀蕙蘭之芳茝
翳華藕之垂房

桑賦 并序

皇太子便坐蓋本將軍直廬也初世祖武皇帝為中
壘將軍植桑一株世更二代年漸三紀扶踈豐衍抑
有瑰異焉

夫何佳樹之洪麗超託居乎紫庭羅萬根以下洞矯
千條而上征豈民梨之能植乃世武之所營故其形
瑰族類體豔衆木黃中爽理滋榮煩縟綠葉興而盈
尺崇條蔓而層尋希太極以延峙映承明而廣臨華
飛鴉之流響想鳴鳥之遺音唯歷數之有紀恒依物
以表德豈神明之所相將我皇之先識誇百世而勿
剪超長年以求植

陸士衡集卷第四

陸士衡集卷第五

晉 吳郡陸 機著

明 新安汪士賢校

皇太子宴玄圃宣猷堂有令賦詩

三正迭紹洪聖啟運自昔哲王先天而順群辟崇替
降及近古黃暉旣渝素靈承枯乃眷斯顧祚之宅土
三后始基世武丕承協風旁駭天畧仰澄淳曜六合
皇慶攸興自彼河汾奄齊七政時文惟晉世篤其聖
欽翼昊天對揚成命九區克咸謳謌以詠皇上纂隆

陸士衡集 卷五
經教弘道于化既豐在工載考俯釐庶績仰荒大造
儀形祖宗妥綏天保篤生我后克明克秀體輝重光
承規景數茂德淵冲天姿王裕蕞爾小臣邈彼荒遐
弛厥負擔振纓承華匪願伊始惟命之嘉

皇太子賜讌詩

明明隆晉茂德有赫思媚上帝配天光宅誕育皇儲
儀形在昔徽言時宣福祿來格勞謙降貴肆敬下臣
肇彼先驅翻成嘉賓

春詠

節運同可悲莫若春氣甚和風未及燠遺涼清且凜

遨遊出西城

遨遊出西城按轡循都邑逝物隨節改時風肅且熠
遷化有常然盛衰自相襲靡靡年時改苒苒老已及
行矣勉良圖使爾脩名立

赴洛二首

希世無高符營道無烈心靖端肅有命假檝越江潭
親友贈予邁揮淚廣川陰撫膺解携手永嘆結遺音
無迹有所匿寂寞聲必沉肆目眇弗及緬然若雙潛

南望泣玄渚北邁涉長林谷風拂脩薄油雲翳高岑
臺臺孤獸騁嚶嚶思鳥吟感物戀堂室離思一何深
佇立慨我歎寤寐涕盈矜惜無懷歸志辛苦誰爲心
羈旅遠遊宦託身承華側撫劍遵銅輦振纓盡祗肅
歲月一何易寒暑忽已革載離多悲心感物情悽惻
慷慨遺安愈未嘆廢寢食思樂樂難誘日歸歸未克
憂苦欲何有纏綿曾與臆仰瞻陵霄鳥羨爾歸飛翼

又赴洛道中二首

總轡登長路嗚咽辭密親借問子何之世網嬰我身
未嘆遵北渚遺思結南津行行遂已遠野途曠無人
山澤紛紆餘林薄杳阡眠虎嘯深谷底雞鳴高樹巔
哀風中夜流孤獸更我前悲情觸物感沉思鬱纏綿
佇立望故鄉顧影悽自憐遠遊越山川山川脩且廣
振策陟崇丘安轡遵平莽夕息抱影寐朝徂銜思徃
頓轡倚嵩巖側聽悲風響清露墜素輝明月一何朗
撫枕不能寐振衣獨長想

招隱

駕言尋飛遁山路鬱盤桓芳蘭振惠葉玉泉涌微瀾

嘉卉獻時服靈木進朝飡朝採南澗藥夕息西山足
輕條象雲構密葉成翠屋結風佇蘭林迴芳薄秀木
尋山求逸民穹谷幽且遐清泉溢王渚文魚躍中波

園葵

種葵北園中葵生鬱萋萋朝榮東北傾夕頽西南晞
零露垂鮮澤朗月耀其輝時逝柔風戢歲暮商飈飛
曾雲無溫液嚴霜有凝威幸蒙高墉德玄景蔭素蕤
豐條並春盛落葉後秋哀慶彼晚彫福忘此孤生悲

招隱

明發心不夷振衣聊躑躅躑躅欲安之幽人在浚谷
朝采南澗藻夕息西山足輕條象雲構密葉成翠幄
激楚佇蘭林回芳薄秀木山溜何泠泠飛泉漱鳴玉
哀音附靈波頽響赴曾曲至樂非有假安事澆淳樸
富貴苟難圖稅駕從所欲

於承明作與士龍

牽世嬰時網駕言遠徂征飲餞豈異族親戚弟與兄
婉孌居人思紆鬱游子情明發遺安寐晤言涕交纓
分途長林側揮袂萬始亭佇眄要遐景傾耳玩餘聲

南歸憇永安北邁頓承明永安有作軌承明子棄予
俯仰悲林薄慷慨含辛楚懷徃歡絕端悼來憂成緒
感別慘舒翮思歸樂春渚

吳王郎中時從梁陳作

在昔蒙嘉運矯迹入崇賢假翼鳴鳳條濯足升龍淵
玄冕無醜士冷服使我妍姪劍拂鞶厲長纓麗且鮮
誰謂伏事淺契濶踰三年薄言肅後命改服就藩臣
夙駕尋清軌遠遊越梁陳感物多遠念慷慨懷古人
贈馮文羆遷斥丘令

於皇聖世時文惟晉受命自天奄有黎獻閭闔既闢
承華再建明明在上有集惟彥奕奕馮生哲問允迪
天保定子靡德不鑠邁心玄曠矯志崇邈遵彼承華
其容灼灼嗟我人斯戢翼江潭有命集止翻飛自南
出自幽谷及爾同林雙情交映遺物識心人亦有言
交道寔難有頽者弁千載一彈今我與子曠世齊歡
利斷金石氣惠秋蘭羣黎未綏帝用勤止我求明德
肆于百里僉曰爾諧俾民是紀乃眷北徂對揚帝祉
疇昔之遊好合纏綿借曰未洽亦旣三年居陪華幄

出從朱輪方驥齊鑣北迹同塵之子既命四牡項領
塗遠蹈騰軌高騁慶雲扶質清風承景嗟我懷人
其邁唯永否泰苟殊窮達有違及子春華後爾秋暉
逝將去我陟彼朔垂非子之念心孰爲悲

荅賈謐并序

余昔爲太子洗馬魯公賈長以散騎常侍侍東宮
積年余出補吳王郎中令元康六年入爲尚書郎魯
公贈詩一篇作此詩荅之二云爾

伊昔有皇肇濟黎蒸先天創物景命是膺降及群后

迭毀迭興邈矣終古崇替有徵在漢之季皇綱幅裂
大辰匿暉金虎習質雄臣馳驚義夫赴節釋位揮戈
言謀王室王室之亂靡邦不泯如彼墜景曾不可振
乃眷三哲俾乂斯民啓土雖難改物承天爰茲有魏
卽宮天邑吳寶龍飛劉亦岳之干戈載揚俎豆載載
民勞師興國玩凱入天厭霸德皇祚告爨獄訟違魏
謳譟適晉陳留歸蕃我皇登禪庸岷稽顙三江改獻
赫矣隆晉奄宅率土對揚天人有秩斯祐惟公太宰
光翼二祖誕育洪胄纂戎于魯東朝旣建淑問我我

我求明德濟同以和魯公戾止袞服委蛇思媚皇儲
高步承華昔我逮茲時惟下僚及子棲遲同林異條
年殊志密服舛義稠游跨三春情固二秋祗承皇命
出納無違往踐蕃朝來步紫微升降祕閣我服載暉
孰云匪懼仰肅明威分索則易携手實難念昔良游
茲焉未歎公之云感貽此音翰蔚彼高藻如玉如蘭
惟漢有木曾不踰境惟南有金萬邦作詠民之胥好
狷狂厲聖儀形在昔予聞子命

贈尚書郎顧彥先二首

大火貞朱光積陽熙自南望舒離金虎屏翳吐重陰
淒風迕時序苦雨遂成霖朝游忘輕羽夕息憶重衾
感物百憂生纏綿自相尋與子隔蕭牆蕭牆阻且深
形影曠不接所託聲與音音聲日夜聞何用慰吾心
朝游遊層城夕息旋直廬迅雷中宵激驚電光夜舒
玄雲拖朱閣振風薄綺疏豐注溢脩雷黃潦浸階除
停陰結不解通衢化爲渠沉稼湮梁穎流民沂荆徐
眷言懷桑梓無乃將爲魚

贈顧交趾八首

顧侯體明德清風肅已邁發迹翼藩后改授撫南裔
伐鼓五嶺表揚旌萬里外遠績不辭小立德不在大
高山安足凌巨海猶縈帶惆悵瞻飛駕引領望歸旆

贈從兄車騎

孤獸思故藪離鳥悲舊林翩翩游宦子辛苦難爲心
彷彿谷水陽婉孌岷山陰管魄懷茲土精爽若飛沉
寤寐靡安豫願言思所欽感彼歸塗艱使我怨慕深
安得忘歸草言樹肯與襟斯言豈虛作思鳥有悲音

答張士然

潔身躋秘閣秘閣峻且玄終朝理文案薄暮不還眠
警言巡明祀致敬在祈年逍遙春玉圃躑躅千畝田
迴渠繞曲陌通波扶直阡嘉穀垂重穎芳樹發華顛
余固水鄉士總轡臨清淵戚戚多遠念行行遂成偏

贈馮文罽

昔與二三子游息承華南柎翼同枝條翻飛各異尋
苟無凌風翮徘徊守故林慷慨誰爲感願言懷所欽
發軔清洛汭驅馬大河陰佇立望朔塗悠悠迥且深
分索古所悲志士多苦心悲情臨川結苦言隨風吟

愧無雜佩贈良訊代兼金夫子茂遠猷欵誠寄惠音

贈弟士龍

行矣愁路長怒焉傷別促指途悲有餘臨觴歡不足
我若西流水子爲東峙岳慷慨逝言感徘徊居情育
安得携手俱契闊成駢服

祖道畢雍孫劉邊仲潘正叔

皇儲延髦俊多士出幽遐適逢時來運與子遊承華
執笏崇賢內振纓層城阿畢劉贊文武潘生蒞邦家
戚別懷遠人願言歎以嗟

荅潘尼

於穆同心如瓊如琳我東日徂來餞其琛彼美潘生
實綜我心探我玉懷疇爾惠音

贈潘尼

水會于海雲翔于天道之所混孰後孰先及子雖殊
同升太玄會彼玄冕襲此雲冠遺情市朝未志丘園
靜猶幽谷動若揮蘭

贈紀士

瓊環俟豐價窈窕不自鬻有美蛾眉子惠音清且淑

陸二集卷五
修姱協姝麗華顏婉如玉

為陸思遠婦作

二合兆嘉偶女子禮有行潔已入德門終遠毋與凡
如何耽時寵遊宦忘歸寧雖為三載婦顧景媿虛名
歲暮饒悲風洞房涼且清拊枕循薄質非君誰見榮
離君多悲心寤寐勞人情敢忘桃李隨側想瑤與瓊

為顧彥先贈婦二首

辭家遠行游悠悠三千里京洛多風塵素衣化為緇
脩身悼憂苦感念同懷子隆思亂心曲沉歡滯不起

歡沉難尅興心亂誰為理願假歸鴻翼飛浙

江

東南有思婦長歎充幽闥借問歎何為佳人眇天末
游宦久不歸山川脩且闊形影參商乖音息曠不達
離合非有常譬彼絃與箏願保金石軀慰妾長饑渴

為周夫人贈車騎一首

碎碎織細練為君作縉繻君行豈有顧憶君是妾夫
昔者得君書聞君在高平今時得君書聞君在京城
京城華麗所璀璨多異人男兒多遠志豈知妾念君
昔者與君別歲律薄將暮日月一何速素秋隊湛露

湛露何冉冉思君隨歲晚對食不能食臨觴不能飲

陸士衡集卷第六

晉 吳郡陸 機著

明 新安汪士賢校

擬行行重行行

悠悠行邁遠戚戚憂思深此思亦何思思君徽與音
音徽日夜離緬邈若飛沉王鮪懷河岫晨風思北林
遊子眇天末還期不可尋驚飈寒反信歸雲難寄音
佇立想萬里沈憂萃我心攬衣有餘帶循形不盈衿
去去遺情累安處撫清琴

擬今日良宴會

閑夜命權友置酒迎風館齊僮梁甫吟秦娥張女彈
哀音繞梁宇遺響入雲漢四座咸同志羽觴不可算
高談一何綺蔚若朝霞爛人生無幾何爲樂常苦晏
譬彼伺晨鳥揚聲當及旦曷爲恒憂苦守此貧與賤

擬迢迢牽牛星

昭昭清漢暉粲粲光天步牽牛西北迴織女東南顧
華容一何冶揮手如振素怨彼河無梁悲此年歲暮
跂彼無良緣皖焉不得度引領望大川雙涕如霑露

擬涉江采芙蓉

上山采瓊蕊穹谷繞芳蘭采采不盈掬悠悠懷所歡
故鄉一何曠山川阻且難况思鍾萬里躑躅獨吟歎

擬青青河畔草

靡靡江蘼草熠熠生河側皎皎彼姝女阿那當軒織
粲粲妖容姿灼灼美顏色良人遊不歸偏棲獨隻翼
空房來悲風中夜起歎息

擬明月何皎皎

安寢北堂上明月入我牖照之有餘輝攬之不盈手

陸士衡集卷六
涼風繞曲房寒蟬鳴高柳踟躕感節物我行未已久
遊宦會無成離思難常守

擬蘭若生朝陽

嘉樹生朝陽凝霜封其條執心守時信歲寒終不凋
美人何其曠灼灼在雲霄隆想彌年月長嘯入飛颺
引領望天末譬彼向陽翹

擬青青陵上栢

苒苒高陵蘋習習隨風翰人生當幾時譬彼濁水瀾
戚戚多滯念置酒宴所歡方駕振飛轡遠遊入長安
名都一何綺城闕鬱盤桓飛閣纓虹帶層臺冒雲冠
高門羅北闕甲第椒與蘭俠客控絕景都人驂王軒
遨遊放情願慷慨爲誰欲

擬東城一何高

西山何其峻層曲鬱崔嵬零露彌天墜蕙葉憑林衰
寒暑相因襲時逝忽如頽三閭結飛轡大耋嗟落暉
曷爲牽世務中心若有違京洛多妖麗王顏伴瓊鞋
閑夜撫鳴琴惠音清且悲長歌赴促節哀響逐高徽
一唱萬夫歎再唱梁塵飛思爲河曲鳥雙游澧水湄

擬西北有高樓

高樓一何峻迢迢峻而安綺窓出塵冥飛陛躡雲端
佳人撫琴瑟纖手清且閑芳氣隨風結哀響馥若蘭
王容誰能顧傾城在一彈佇立望日吳躑躅再三歎
不怨佇立久但願歌者歡思駕歸鴻羽比翼雙飛翰
擬庭中有奇樹
歡友蘭時往迢迢匿音徽虞淵引絕景四節逝若飛
芳草久已茂佳人竟不歸躑躅遵林渚惠風入我懷
感物戀所歡採此欲貽誰

擬明月皎夜光

歲暮涼風發昊天肅明明招搖西北指天漢東南傾
朗月照閑房蟋蟀吟戶庭翻翻歸鴈集嘒嘒寒蟬鳴
疇昔同宴友翰飛戾高冥服美改聲聽居愉遺舊情
織女無機杼大梁不架楹

樂府十七首

猛虎行

渴不飲盜泉水熱不息惡木陰惡木豈無枝志士多
苦心整駕肅時命杖策將遠尋飢食猛虎窟寒棲野

雀林日歸功未建時往歲載陰崇雲臨岸駭鳴條隨
風吟靜言幽谷底長嘯高山岑急絃無懦響亮節難
爲音人生誠未易曷云開此矜眷我耿介懷俯仰愧
古今

君子行

天道夷且簡人道嶮而難休咎相乘躡翻覆若波瀾
去疾苦不遠疑似實生患近火固宜熱履冰豈惡寒
掇蜂滅天道拾塵惑孔顏逐臣尚何有棄友焉足歎
福鍾恒有兆禍集非無端天損未易辭人益猶可歎

朗鑒豈遠假取之在傾冠近情苦自信君子防未然

從軍行

苦哉遠征人飄飄窮四遐南陟五嶺巔北戍長城阿
谿谷深無底崇山鬱嵯峨奮臂攀喬木振迹涉流沙
隆暑固已慘涼風嚴且苛夏條集鮮藻寒冰結衝波
胡馬如雲屯越旗亦星羅飛鋒無絕影鳴鏑相和
朝食不免胄夕息常負戈苦哉遠征人撫心悲如何

豫章行

汎舟清川渚遙望高山陰川陸殊塗軌懿親將遠尋

陸士衡集卷六
三荆歡同株四鳥悲異林樂會良自古悼別豈獨今
寄世將幾何日晷無停陰前路既已多後塗隨年侵
促促薄暮景疊疊鮮克禁曷爲復以茲曾是懷苦心
遠節嬰物淺近情能不深行矣保嘉福景絕繼以音

苦寒行

北遊幽朔城涼野多嶮難俯入窮谷底仰陟高山盤
凝冰結重礪積雪被長巒陰雲興崑側悲風鳴樹端
不覩白日景但聞寒鳥喧猛虎憑林嘯玄猿臨岸歎
夕宿喬木下慘愴恒鮮歡渴飲堅冰漿飢待零露餐

離思固已久寤寐莫與言劇哉行役人慊慊恒苦寒

飲馬長城窟行

驅馬陟陰山山陰馬不前往問陰山侯勁虜在燕然
戎車無停軌旌旆屢徂遷仰憑積雪崑俯涉堅冰川
冬來秋未反去家邈以縣獫狁亮未夷征人豈徒旋
末德爭先鳴凶器無兩全師克薄賞行軍沒微軀捐
將遵甘陳迹收功單于旃振旅勞歸士受爵藁街傳

門有車馬客行

門有車馬客駕言發故鄉念君久不歸濡跡涉江湘

投袂赴門 攬衣不及裳 撫膺携客泣 淹淚叙溫涼
借問邦族間 惻愴論存亡 親友多零落 舊齒皆彫喪
市朝互遷易 城闕或丘荒 墳壟日月多 松柏鬱蒼蒼
天道信崇替 人生安得長 慷慨惟平生 俛仰獨悲傷

君子有所思行

命駕登北山 延佇望城郭 塵里一何盛 街巷紛漠漠
甲第崇高闥 洞房結阿閣 曲池何湛湛 清川帶華薄
邃宇列綺窓 蘭室接羅幕 淑貌色斯升 哀音承顏作
人生誠行邁 容華隨年落 善哉膏粱士 營生與且博

冥安消靈根 鷓毒不可恪 無以肉食資 取笑葵與藿

齊謳行

營丘負海曲 沃野爽且平 洪川控河濟 崇山人高冥
東被姑尤側 南界聊攝城 海物錯萬類 陸產尚千名
孟諸吞楚夢 百二侔秦京 惟師恢東表 桓后定周傾
天道有迭代 人道無久盈 鄙哉牛山歎 未及至人情
爽鳩苟已徂 吾子安得停 行行將復去 長存非所營

日出東南隅行

或曰羅敷艷歌

扶桑升朝暉 照此高臺端 高臺多妖麗 濬房出清顏

陸士衡集卷六
七
淑貌耀皎日惠心清且閑美目揚王澤蛾眉象翠翰
鮮膚一何潤秀色若可餐窈窕多容儀婉媚巧笑言
暮春春服成粲粲綺與結金雀垂藻翹瓊佩結瑤璠
方駕揚清塵濯足洛水瀾藹藹風雲會佳人一何繁
南崖充羅幕北渚盈軒軒清川含藻景高岸被華艸
馥馥芳袖揮泠泠纖指彈悲歌吐清響雅舞播幽蘭
丹唇含九秋妍迹陵七盤赴曲迅驚鴻蹈節如集鸞
綺態隨顏變沈姿無定源俯仰紛阿那顧步咸可懽
遺芳結飛飈浮景映清湍治容不足詠春游良可歎

長安有狹邪行

伊洛有岐路岐路交朱輪輕蓋承華景騰步躡飛塵
鳴玉豈不儒馮軾皆俊民烈心厲勁秋麗服鮮芳春
余本倦游客豪彥多舊親傾蓋承芳訊欲鳴當及晨
守一不足矜岐路良可遵規行無曠迹矧步豈逮人
投足緒已爾四時不必循將遂殊塗軌要子同歸津

前緩聲歌

游僊聚靈族高會層城阿長風萬里舉慶雲鬱嵯峨
宓妃興洛浦王韓起太華北徵瑤臺女南要湘川娥

蕭蕭宵駕動翩翩翠蓋羅羽旗
灑瓊鸞王衡吐鳴和
太容揮高絃洪崖發清歌
獻酬既已周輕舉乘紫霞
總轡扶桑枝濯足湯谷波
清輝溢天門垂慶惠皇家

長歌行

逝矣經天日悲哉帶地川
寸陰無停晷尺波豈徒旋
年往迅勁矢時來亮急弦
遠期鮮克及盈數固希全
容華夙夜零體澤坐自捐
茲物苟難停吾壽安得延
俛仰逝將過倏忽幾何間
慷慨亦焉訴天道良自然
但恨功名薄竹帛無所宣
迨及歲未暮長歌承我閑

吳趨行

楚妃且勿歎齊娥且莫謳
四坐並清聽聽我歌吳趨
吳趨自有始請從閭門起
閭門何峨峨飛閣跨通波
重欒承游極回軒啟曲阿
藹藹慶雲被泠泠祥風過
山澤多藏育士風清且嘉
泰伯導仁風仲雍揚其波
穆穆延陵子灼灼光諸華
王迹隕陽九帝功興四遐
大皇自富春矯首頓世羅
邦彥應運興粲若春林葩
屬城咸有士吳邑最爲多
八族未多侈四姓實名家
文德熙淳懿武功侔山河
禮讓何濟濟流化自滂沱

西子集卷六
九
淑美難窮紀商權爲此歌

塘上行

江籬生幽渚微芳不足宣被蒙風雲會移居華池邊
發藻玉臺下垂影滄浪泉露潤旣已渥結根與且堅
四節逝不處繁華難久鮮淑氣與時隕餘芳隨風捐
天道有遷易人理無常全男懼智傾愚女愛衰避妍
不惜微軀退但懼蒼蠅前願君廣末光照妾薄暮年

悲哉行

游客芳春林春芳傷客心和風飛清響鮮雲垂薄陰
蕙草饒淑氣時鳥多好音翩翩鳴鳩羽啾啾倉庚吟
幽蘭盈通谷長秀被高岑女蘿亦有託蔓葛亦有尋
傷哉客遊士憂思一何深日感隨氣草耳悲詠時禽
寤寐多遠念緬然苦飛沉願託歸風響寄言遺所欽

短歌行

置酒高堂悲歌臨觴人壽幾何逝如朝霜時無重至
華不再揚蘋以春暉蘭以秋芳來日苦短去日苦長
今我不樂蟋蟀在房樂以會興悲以別章豈曰無感
憂爲子忘我酒旣旨我看旣減短歌有詠長夜無荒

寂寂多感念 餘悲苦 燕尔 匪指 離風 警音 言 鬱 祗 煥
謝姑 容 幾 士 憂 思 一 何 采 日 歎 亂 麻 草 耳 悲 精 和 禽
幽 蘭 盈 巖 谷 身 委 郊 高 岑 女 蘿 亦 有 指 蔓 蔓 亦 有 華
蕙 草 薺 亦 有 廉 却 鳥 多 致 音 隔 隔 鳥 獸 不 知 音 會 與 今

陸士衡集卷第七

晉 吳郡陸 機著
明 新安汪士賢校

折楊柳

邈矣垂天景壯哉 奮地雷豐隆 豈久響 華光但西墮
日落似有竟時逝 恒若催仰悲 朗月運坐觀 璇蓋廻
盛門無再入 衰房莫苦開 人生固已短 出處鮮為諧
慨慨惟昔人 興此千載懷 升龍悲絕處 葛藟變條枚
寤寐豈虛歎 曾是感與摧 弭意無足歡 願言有餘哀

鞠歌行 雜言

朝雲升應龍攀乘風遠遊騰雲端
鼓鐘歇豈自歡急絃高張思和彈
時希值年夙愆循已雖易人知難
王陽登貢公歡罕生既沒國子歎
嗟千載豈虛言邈矣遠念情愴然

當置酒

置酒宴佳賓瞻眺臨飛觀絕嶺隔丈餘
長嶼橫江半日色花上綺風光水中亂
三益既歲繼四始方葱粲

健仔怨

健行去辭寵淹留終不見寄情在玉階
託意唯團扇春苔暗階除秋草蕪
高殿昏黃履綦絕愁來空雨面

燕歌行

四時代序逝不追寒風習習落葉飛
蟋蟀在堂露盈墀念君客遊苦
恒悲君何緬然久不歸賤妾悠悠心
無違白日既沒明燈輝夜禽赴林匹
鳴棲雙鳩關關宿河湄憂來感物涕
不晞非君之念思為誰離別何早會
何遲

悲哉行

陸士衡集卷七
二
萋萋春草生王孫猶有情
差池鷺始飛天裊樾始榮
灼灼樾悅色飛飛鷺弄聲
檐上雲結陰澗下風吹清
幽樹雖改觀終始在初生
松鷺歡蔓延穆葛欣纍纍
眇然游宦子晤言來未并
鼻感改朔氣心傷變節榮
侘傺豈徒然澶漫絕音形
風來不可託鳥去豈爲聽

梁甫吟

王衡固已驟義和若飛凌
四運循環轉寒暑自相承
冉冉年時暮迢迢天路微
招搖東北指大火西南昇
悲風無絕響玄雲互相仍
豐水憑川結零露彌天凝

年命特相逝慶雲鮮克乘
履信多愆期思順焉足憑
慷慨臨川響非此孰爲興
哀吟梁甫顛慷慨獨撫膺

董逃行

董卓時童謠名

和風習習薄林柔條布葉
垂陰鳴鳩拂羽相尋倉庚
啾啾弄音感時悼逝傷心
日月相追周旋萬里倏忽
幾年人皆冉冉西遷盛時
一往不還慷慨垂念悽然
昔爲少年無憂常恡秉燭
夜遊翩翩常征何求于今
知此有由但爲老去年適
盛固有衰不疑長夜冥冥
無期何不驅馳及時聊樂
永日自怡賚此遺情何之

人生居世爲安豈若及時爲歡世道多故萬端憂慮
紛錯交顏老行及之長歎

月重輪行

人生一時月重輪盛年安可持月重輪吉凶倚伏百
年莫我與期臨川曷悲悼茲去不從肩月重輪功名
不勗之善哉古人揚聲敷聞九服身名流何穆旣自
才難旣嘉運亦易愆俛仰行老存沒將何所觀志士
慷慨獨長歎獨長歎

日重光行


日重光柰何天廻薄日重光冉冉其遊如飛征日重
光今我日萼萼之盛日重光倏忽過亦安停日重光
盛往衰亦必來日重光譬如四時固恒相催日重光
推命有分可營日重光但惆悵才志日重光身歿之
後無遺名

挽歌三首

卜擇考休貞嘉命咸在茲夙駕驚徒御結轡頓重基
龍幌被廣柳前驅矯輕旗殯宮何嘈嘈哀饗沸中闈
中闈且勿謹聽我薤露詩死生各異倫祖載當有時

舍爵兩楹位啓殯進靈輶飲餞觴莫舉出宿歸無期
 帷衽曠道影棟宇與子辭周親咸犇湊友朋自遠來
 翼翼飛輕軒駸駸策素騏按轡遵長薄送子長夜臺
 呼子子不聞泣子子不知歎息重欄側念我疇昔時
 三秋猶是收萬世安可思殉沒身易亡殺子非所能
 含言言哽噎揮涕涕流離

流離親友思惆悵神不忝素驂佇轡軒玄駟驚飛蓋
 哀鳴興殯宮迴遲悲野外魂輿寂無響但見冠與帶
 備物象平生長旌誰為飾悲風微行



振策指靈丘駕言從此逝

重阜何崔嵬玄廬竄其間旁薄立四極穹隆放蒼天
 側聽陰溝涌卧觀天井懸廣宵何寥廓大暮安可晨
 人往有返歲我行無歸年昔居四民宅今託萬鬼隣
 昔為七尺軀今成灰與塵金玉素所佩鴻毛今不振
 豐肌饗螻蟻妍姿永夷垠壽堂延魑魅虛無自相賓
 螻蟻爾何怨魑魅我何親拊心痛荼毒永歎莫為陳

百年歌十首

一十時顏如薜蘿疇有暉體如飄風行如飛變彼孺

子相追隨終朝出遊薄暮歸六情逸豫心無違清酒
漿炙柰樂何清酒漿炙柰樂何

二十時膚體彩澤人理成美目淑貌灼有榮被服冠
帶麗且清光車駿馬遊都城高談雅步何盈盈清酒
漿炙柰樂何清酒漿炙柰樂何

三十時行成名立有令聞力可扛鼎志干雲食如漏
卮氣如熏辭家觀國綜典文高冠素帶煥翩紛清酒
漿炙柰樂何清酒漿炙柰樂何

四十時體力克壯志方剛跨州越郡還帝鄉出入承
明棟大璫清酒漿炙柰樂何清酒漿炙柰樂何

五十時荷旄仗節鎮邦家鼓鐘嘈囀趙女歌羅衣綵
粲金翠華言笑雅舞相經過清酒漿炙柰樂何清酒
漿炙柰樂何

六十時年亦耆艾業亦隆驟駕四牡入紫官軒冕納
那翠雲中子孫昌盛家道豐清酒漿炙柰樂何清酒
漿炙柰樂何

七十時精爽頗損膂力愆清水明鏡不欲觀臨樂對
酒轉無歡攬形羞髮獨長歎

八十時明已損目聰去耳前言往行不復紀辭官致
祿歸桑梓安居駟馬入舊里樂事告終憂事始

九十時日告耽瘁月告衰形體雖是志意非多言謬
誤心多悲子孫朝拜或問誰指景玩日慮安危感念
平生淚交揮

百歲時盈數已登肌肉單四支百節還相患目若濁
鏡口垂涎呼吸頓蹙反側難茵褥滋味不復安

秋胡行

道雖一致塗有萬端吉凶紛藹休咎之源人鮮知命

命未易觀生亦何惜功名所歎

順東西門行

日出西門望天庭陽谷既虛崦嵫盈感朝露悲人生
逝者若斯安得停桑樞戒蟋蟀鳴我今不樂歲聿征
迨末年莫及世平置酒高堂宴友生激朗笛彈哀箏
取樂今日盡歡情

上留田行

嗟行人之藹藹駿馬陟原風馳輕舟汎川雷邁寒往
暑來相尋零雪霏霏集宇悲風徘徊入襟歲華冉冉

方除我思纏綿未紓感時悼逝悽如

隴西行

我靜而鏡民動如烟事以形兆應以象懸豈曰無才
世鮮興賢

駕言出北闕行

駕言出北闕躑躅遵山陵長松何鬱鬱丘墓互相承
念昔徂歿子悠悠不可勝安寢重冥廬天壤莫能與
人生何所促忽如朝露凝辛苦百年間戚戚如履水
仁知亦何補遷化有明徵求仙鮮克仙太虛不可

良會罄美服對酒宴同聲

太山吟

太山一何高迢迢造天庭峻極周已遠曾雲鬱冥冥
梁甫亦有館蒿里亦有亭幽塗延萬鬼神房集百靈
長鳴太山側慷慨激楚聲

擢歌行

遲遲暮春日天氣柔且嘉元吉隆初已濯穢遊黃河
龍舟浮鷁首羽旗垂藻葩乘風宣飛景逍遙戲中波
名謳激清唱榜人縱棹歌投綸沉洪川飛繳入紫霞

陸士衡集卷第七
東武行吟

投跡短世間高步長生關
濯髮冒雲冠洗身被羽衣
飢從韓衆餐寒就佚女樓

飲酒樂

蒲萄四時芳醇瑠璃千鍾舊
賓夜飲舞遲銷燭朝醒
弦促催人

陸士衡集卷第七

陸士衡集卷第八

晉 吳郡陸 機著

明 新安汪士賢校

演連珠五十首

臣聞日薄星迴穹天所以紀物山盈川冲后土所以
播氣五行錯而致用四時違而成歲是以百官恪居
以赴八音之離明君執契以要克諧之會

臣聞任重於力才盡則困用廣其器應博則凶是以
物勝權而衡殆形過鏡則照窮故明主程才以效業

臣士衡集卷八
貞臣底力而辭豐

臣聞髦俊之才世所希乏丘園之秀因時則揚是以
大人基命不擢才於后土明主聿興不降佐於昊蒼

臣聞世之所遺未為非寶主之所珍不必適治是以
俊乂之藪希蒙翹車之招金碧之崑必辱鳳舉之使

臣聞祿放於寵非隆家之舉官私於親非興邦之選
是以三卿世及東國多衰弊之政五侯並軌西京有
陵夷之運

臣聞靈輝朝覲石物納照時風夕灑程形賦音是以

至道之行萬類取足於世大化既洽百姓無心置於

臣聞頓網探淵不能招龍振網羅雲不必招鳳是以
巢箕之叟不眇丘園之幣洗渭之民不發傳崑之

臣聞鑑之積也無厚而照有重淵之深目之察也有
畔而眡周天壤之際何則應事以精不以形造物以
神不以器是以萬邦凱樂非悅鐘鼓之娛天下歸仁
非感玉帛之惠

臣聞積實雖微必動於物崇虛雖廣不能移心是以
都人冶容不悅西施之影乘馬班如不輟太山之陰

臣聞應物有方居難則易藏器在身所乏者時是以
充堂之芳非幽蘭所難繞梁之音實縈絃所思

臣聞智周通塞不為時窮才經夷險不為世屈是以
凌飈之羽不求反風曜夜之目不思倒日

臣聞忠臣率志不謀其報貞士發憤期在明賢是以
柳莊黜櫝非貪瓜行之賞禽息碎首豈要先茅之田

臣聞利眼臨雲不能垂照朗璞蒙垢不能吐暉是以
明哲之君時有蔽壅之累俊乂之臣屢抱後時之悲

臣聞郁烈之芳出於委灰繁會之音生於絕絃是以
貞女要名於沒世烈士赴節於當年

臣聞良宰謀朝不必借威貞士衛主脩身則足是以
三晉之強屈於齊堂之俎千乘之勢弱於陽門之哭

臣聞赴曲之音洪細入韻蹈節之容俯仰依詠是以
言苟適事精粗可施士苟適道修短可命

臣聞因雲灑潤則芬澤易流乘風載響則音徽自遠
是以德教俟物而濟榮名緣時而顯

臣聞覽影偶質不能解獨指跡慕遠無救於遲是以
循虛器者非應物之具玩空言者非致治之機

臣聞鑄燧吐火以續湯谷之晷揮翮生風而繼飛廉
之功是以物有微而毗著事有瑣而助洪

臣聞春風朝煦蕭艾蒙其溫秋霜宵墜芝蕙被其涼
是以威以齊物爲肅德以普濟爲弘

臣聞性之所期貴賤同量理之所極卑高一歸是以
淮月稟水不能加涼晞日引火不必增輝

臣聞巧盡於器習數則貫道繫於神人亡則滅是以
輪匠肆目不乏奚仲之妙瞽史清耳而無伶倫之

臣聞絕節高唱非凡耳所悲肆義芳訊非庸聽所善

是以南荆有寡和之歌東野有不釋之辯

臣聞尋烟染芬蕙息猶芳徵音錄響操終則絕何則
垂於世者可繼止乎身者難結是以玄晏之風恒存
動神之化已滅

臣聞託闇藏形不爲巧密倚智隱情不足自匿是以
重光發藻尋虛捕景大人貞觀探心昭忒

臣聞披雲看霄則天文清澄風觀水則川流平是以
四族放而唐劭二臣誅而楚寧

臣聞音以比耳爲美色以悅目爲歡是以衆聽所傾

非假北里之操萬夫婉變非俟西子之顏故聖人隨世以擢佐明主因時而命官

臣聞出乎身者非假物所隆牽乎時者非克已所勗是以利盡萬物不能救童昏之心德表生民不能救
接遑之辱

臣聞動循定檢天有可察應無常節身或難照是以望景揆日盈數可期撫臆論心有時而謬

臣聞傾耳求音抵優聽苦澄心徇物形逸神勞是以天殊其數雖同方不能分其感理塞其通則並質不生重於利故據圖無揮劍之痛義重於身故臨川有投跡之哀

臣聞圖形於影未盡纖麗之容察火於灰不覩洪赫之列是以問道存乎其人觀物必造其質

臣聞通於變者用約而利博明其要者器淺而應玄是以天地之曠該於六位萬殊之曲窮於五絃

臣聞情見於物雖遠猶踈神藏於形雖近則密是以儀天步晷而脩短可量臨淵揆水而淺深難察

臣聞虐暑薰天不減堅冰之寒涸陰凝地無累陵火之熱是以吞縱之強不能反蹈海之志漂鹵之威不能降西山之節

臣聞理之所開力所常達數之所塞威有必窮是以烈火流金不能焚景沉寒凝海不能結風

臣聞足於性者天損不能入貞於期者時累不能淫是以迅風陵雨不謬晨禽之察勁陰殺節不凋寒木之心

七徵

玄虛子耽性冲素雍容玄泊棄時俗而弗徇甘漁釣於一壑乃有通微大夫怨皇后之失寶傷鴻誓之後聞策玄黃於榛險憑穴崑而放言通微大夫曰竒膳王食窮滋致豐簡犧羽族考牲毛宗俯出沉鮪仰落歸鴻剖柔胎於孕豹宰潛肝乎豢龍拾朝陽之遺卵納丹穴之飛凰神宰竒稔嘉禾之穗含滋發馨素頰王銳灼若皓雪之頰玄雲皎若明珠之積緇匱素蟻踊而澆澗滋芬溢而相微味雖濃而弗爽氣旣惠而復竒介景福於眉壽裕温克乎齊聖子能饗之乎通

微大夫曰豐居華殿奇構磊落萬宇雲覆千楹林錯
仰綏瑰木俯積瑛石敷延袤之廣廡矯凌霄之高閣
秀清暉乎雲表騰藻蔭之奕奕珍觀清榭岳立連行
雲階飛陛仰陟穹蒼聳浮柱而虬立施飛檐以龍翔
回房旋室綴珠襲玉圖畫神仙延祐承福懸闥高達
長廊迴屬於是登漸臺理俊音鏡玄吐望長林逐狡
獸弋輕禽覽壯藝以悅觀聆和樂而怡心子能居之
乎通微大夫曰金石諧而齊響埴甃協而和鳴於是
才人進羽籥玄弁被藻襲俯縈領以鴻歸仰矯首而
能共其休

臣聞遜世之士非受瓠瓜之性幽居之女非無懷春
之情是以名勝欲故偶影之操矜窮愈達故一霄之
節厲

臣聞聽極於音不慕鈞天之樂身足於蔭不假垂天
之雲是以蒲密之黎遺時雍之世豐沛之士忘桓撥
之君

臣聞飛轡西頓則離朱與矇眊收察懸景東秀則夜
光與珞珞匿耀是以才換世則俱困功偶時而並劭

陸二復集卷八
臣聞不應於近遠有可察託驗於顯微或可包是以
寸管不侔天地不能以氣欺尺表逆立日月不能以
形逃

臣聞絃有常音故曲終則改鏡無畜影故觸形則照
是以虛已應物必究千變之容挾情適事不觀萬殊
之妙

臣聞祝啟希聲以諧金石之和鼙鼓踈擊以節繁絃
之契是以經治必先其通圖物恒審其會

臣聞目無常音之察耳無照景之神故在乎我者不
誅之於已存乎物者不求備於人

臣聞放身而居體逸則安肆口而食屬厭則克是以
王鮪登俎不假吞波之魚蘭膏停室不思銜燭之

臣聞衝波安流則龍舟不能以漂震風洞發則夏屋
有時而傾何則牽乎動則靜凝係乎靜則動貞是以
淫風大行貞女蒙冶容之誨淳化殷流盜跖挾曾史
之情

臣聞達之所服貴有或遺窮之所接賤而必尋是以
江漢之君悲其陔屨少原之婦哭其亡簪

臣聞觸非其類雖疾不應感以其方雖微則順是以
商飈漂山不興盈尺之雲谷風乘條必降彌天之潤
故聞於治者唱繁而和寡審乎物者力約而功峻
臣聞烟出於火非火之和情生於性非性之適故火
壯則烟微性克則情約是以殷墟有感物之悲周京
無佇立之跡
臣聞適物之技俯仰異用應事之器通塞異任是以
鳥栖雲而繳飛魚藏淵而網沉賁鼓密而含響朗笛
踈而吐音

鶴立激長歌而丹唇發鏗鏘乎桑木合清商以絕節
揮流徵而赴曲奏商荆之高歎詠易水之清角爾乃
覩蛾眉之羣麗容旣都而又閑矯纖腰以逐節頓皓
足於鼓盤舒妍暉以妖韶若陵危之未安通微大夫
曰蓋聞洙北有采唐之思淇上有送予之歎關雎以
寤寐爲戚溱洧以謔浪爲歡若夫妖嬪豔女蒐羣擢
俊穆藻儀於令表茂當年之柔嫚罄妍規之約綽體
每變而增閑秀紅粧其愉愉若餘穎之可食若夫靈
晷潛祖頰退羽觴升清琴厲因清明以宣誠流微睇

而授愛纖手揮而鳴佩鏗華衿被則芳塵萃子其納
之乎通微大夫曰塗有殊而一致業有殊而名約各
因姿以效績期寄響於天人也孰與顯竒蹤於萬邦
撫六轡而高遊瞰八宇以攄眇齊清風乎諸侯言成
否泰氣作溫涼弭侵略於強暴綜墜紀乎危邦子豈
不願斯之雍容乎通微大夫曰明王應期撫民以德
配仁風於黃唐齊威靈乎宸極藝倫幸序庶績咸乂
盪流風於雍俗給天民乎齊泰是以玄靈感而表應
嘉神繁而畢覲舞唐庭之來儀鳴岐陽之鸞鷲應天

監之休命荷神聽之介福然聖主達持盈之寶術寤
經國之在賢各畢榮於分局期贊化於大鈞吾子豈
不欲縻好爵於天宇顯列業乎帝臣歟玄虛子作而
言曰甚哉鄙人之惑也猶窮繩自逸於井幹憑河盜
本於黃川欽至論敷敝社謹聞命於王孫

陸士衡集卷第八

陸士衡集卷第八

十一

陸士衡集卷第九

漢高祖功臣頌

晉 吳郡陸 機著
明 新安汪士賢校

相國鄧文終侯沛蕭何相國平陽懿侯沛曹參太子
少傅留文成侯韓張良丞相曲逆獻侯陽武陳平楚
王淮陰韓信梁王昌彭越淮南王六黥布趙景王大
梁張耳韓王韓信燕王豐盧縮長沙文王吳芮荆王
沛劉賈太傅安國懿侯王陵左丞相絳武侯沛周勃

相國舞陽侯沛樊噲右丞相曲周景侯高陽酈商太僕汝陰文侯沛夏侯嬰丞相潁陰懿侯睢陽灌嬰代丞相陽陵景侯魏傅寬車騎將軍信武肅侯靳歙大行廣野君高陽酈食其中郎建信侯齊劉敬大中大夫楚陸賈太子太傅稷嗣君薛叔孫通魏無知護軍中尉隨何新成三老董公轅生將軍紀信御史大夫沛周苛平國君侯公右三十一人與定天下安社稷者也

頌曰茫茫宇宙上參下躡波振四海塵飛五岳九服徘徊三靈改卜赫矣高祖肇載天祿沉跡中鄉飛名帝錄慶雲應輝皇階授木龍興泗濱虎嘯豐谷彤雲晝聚素靈夜哭金精仍頽朱光以渥萬邦宅心駿民效足堂堂蕭公王跡是因綢繆獻后無競惟人外濟六師內撫三秦拔奇夷難邁德振民體國垂制上穆下親名蓋羣后是謂宗臣平陽樂道在變則通爰淵爰嘿有此武功長驅河朔電擊壤東協策淮陰亞跡蕭公文成作師通幽洞冥永言配命因心則靈窮神觀化望影揣情鬼無隱謀物無遁形武關是闢鴻門

是寧隨難 陽卽謀下邑銷印甚廢推齊勸立運籌
固陵定策東襲三王從風五侯允集霸楚實喪皇漢
凱入怡顏高覽弭翼鳳戢託跡黃老辭世却粒曲逆
宏達好謀能深游精杏漠神跡是尋重玄匪與九地
匪沉伐謀先兆擠響于音竒謀六奮嘉慮四廻規主
于足離項于懷恪人乃謝楚翼寔摧韓王窘執胡馬
洞開迎文以謀哭高以哀灼灼淮陰靈武冠世策出
無方思入神契奮臂雲興騰跡虎噬凌險必夷摧堅
則脆肇謀漢濱還定渭表京索旣扼引師北討濟河

夷魏登山滅趙威亮火烈勢踰風掃拾代如遺偃不
猶草二州肅清四邦咸舉乃眷北燕遂表東海克滅
龍且爰取其旅劉項懸命人謀是與念功惟德舜通
絕楚彭越觀時弢跡匿光民具爾瞻翼爾鷹揚威凌
楚域質委漢王靖難河濟卽宮舊梁烈烈黥布耽耽
其眇名冠強楚鋒猶駭電觀幾蟬蛻悟主革面肇彼
梟風翻爲我扇天命方輯王在東夏矯矯三雄至于
垓下元凶旣夷寵祿來假保大全柝非德孰可謀之
不滅舍福取禍張耳之賢有聲梁魏士也罔極自貽

伊媿俯思舊恩仰察五緯脫跡違難披榛來洎改策
西秦報辱北冀悴葉更耀枯條以肆王信韓孽宅土
開疆我圖爾才越遷晉陽盧縮自微婉妾我皇跨功
踰德祚爾輝章人之貪禍寧爲亂亡吳芮之王祚由
梅銷功微勢弱世戰忠賢肅肅荆王董我三軍我圖
四方殷薦其勛庸親作勞舊楚是分往踐厥宇大啟
淮瀆安國違親悠悠我思依依哲母旣明且慈引身
伏劍未言固之淑人君子寔邦之基義形於色憤發
於辭主亡與亡未命是期絳侯質木多略寡言曾是

忠身惟帝攸歎雲鷺靈丘景逸上蘭平代禽豨奮
燕韓寧亂以武斃呂以權滌穢紫宮徵帝太原實惟
太尉劉宗以安挾功震主自古所難勲耀上代身終
下藩舞陽道迎延帝幽藪宣力王室匪惟厥武總于
鴻門披闥帝宇聳顏誚項掩淚寤主曲周之進于其
哲兄俾率爾徒從王于征振威龍蛇攄武庸城六師
寔因克荼禽猗歟汝陰綽綽有裕戎軒肇跡荷策
來附馬煩轡殆不釋擁樹皇儲時又平城有謀穎陰
銳敏屢爲軍鋒奮戈東城禽項定功乘風藉響高步

長江收吳引淮光啟于東陽陵之勛元帥是承信武
薄伐揚節江陵夷王殄國俾亂作懲恢恢廣野誕節
令圖進謁嘉謀退守名都東規白馬北距飛狐卽倉
敖庾據險三塗輜軒東踐漢風載徂身死于齊非說
之辜我皇寔念言祚爾孤建信委輅被褐獻寶指明
周漢銓時論道移帝伊洛定都鄴鎬柔遠鎮邇寔敬
攸考抑抑陸生知言之貫往制勁越來訪皇漢附會
平勃夷凶翦亂所謂伊人邦家之彥百王之極舊章
靡存漢雖朗朝儀則昏稷嗣制禮下肅上尊穆穆

帝典煥其盈門風晞三代憲流後昆無知獻敏獨明
竒跡察侔蕭相貺同師錫隨何辯達因資於敵紆漢
披楚維生之績皤皤董叟謀我平陰三軍縞素天下
歸心袁生秀朗沉心善照漢沛南振楚威自撓大略
淵回元功響效邈哉維人何識之妙紀信誑項軺軒
是乘攝齊赴節用死孰懲身與烟消名與風興周苛
慷慨心若懷冰形可以暴志不可凌貞軌借沒亮跡
雙升帝疇爾庸後嗣是膺天地雖順王心有違懷親
望楚未言長悲侯公伏軾皇媪來歸是謂平國寵命

有輝震風過物清濁效響大人于興利在攸往弘海
者川崇山惟壤韶濩錯音袞龍比象明明衆哲同濟
天網劍宣其利鑒獻其朗文武四克漢祚克廣悠悠
遐風千載是仰

丞相箴

夫導民在簡爲政以仁仁實生愛簡亦易遵罔疏下
睦禁密巧繁深文碎教伊何能存故人不可以不審
任不可以不忠捨賢昵讒則喪爾邦且偏見則昧專
聽悔疑耳目之用亦各有期夫豈不察而帷牆隔之

矜已任智是蔽是欺德無遠而不復惡何遠而不追
存亡日鑒成敗代陳人咸知鏡其貌而莫德照其身

孔子贊

孔子獻聖配天弘道風扇玄流思探神寶明發懷周
興言謨老靈魄有行言觀蒼昊清歌先誠丹書有造

王子喬贊

遺形靈岳顧景忘歸乘雲倏忽飄颻紫微

至洛與成都王牋

王室多故禍難荐有羊玄之乘寵凶豎專記朝政姦

臣賊于是爲北周皇甫同惡相求共爲亂階至今
天子飄飄甚於贅旒伏惟明公匡濟之舉義命方宣
元戎旣啟風威電赫機以駑暗文武寡施猥蒙橫授
委任外梱輒承嚴教董率諸軍唯力是視

謝平原內史表一首

陪臣陸機言今月九日魏那太守遣兼丞張含齋板
詔書印綬假臣爲平原內史拜受祇竦莫知所裁臣
機頓首死罪死罪臣本吳人出自敵國世無先臣官
力之效才非丘園敢介之秀皇澤廣被惠濟無遠擢

自羣萃累蒙榮進入朝九載歷官有六身登三閣官
成兩官服冕乘軒仰齒貴遊振景拔迹顧邈同列施
重山岳義足灰沒遭國顛沛無節可紀雖蒙曠蕩臣
獨何顏俛首頓膝憂媿若厲而橫爲故齊王冏所見
枉陷誣臣與衆人共作禪文幽執囹圄當爲誅始臣
之微誠不負天地倉卒之際慮有逼迫乃與弟雲及
散騎侍郎袁瑜中書侍郎馮熊尚書右丞崔基廷尉
正顧榮汝陰太守曹武思所以獲免陰蒙避回崎嶇
自列片言隻字不關其間事蹤筆跡皆可推校而一

朝翻然更以爲罪葢爾之生尚不足吝區區本懷實
有可悲畏通天威卽罪惟謹鉗口結舌不敢上訴所
天莫大之釁日經聖聽肝血之誠終不一聞所以臨
難慷慨而不能不恨恨者唯此而已重蒙陛下愷悌
之宥回霜收電使不隕越復得扶老携幼生出獄戶
懷金拖紫退就散輩感恩惟咎五情震悼跼天躅地
若無所容不悟日月之明遂垂曲照雲雨之澤播及
朽瘁忘臣弱才身無足采哀臣零落罪有可察苟削
丹書得夷平民則塵洗天波謗絕衆口臣之始望尚

未至是猥辱大命顯授符虎使春枯之條更與秋蘭
垂芳陸沉之羽復與翎鴻撫翼雖安國免徒起紆青
組張厥亡命坐致朱軒方臣所荷未足爲恭豈臣蒙
垢含吝所宜忝竊非臣毀宗夷族所能上報喜懼參
并悲慙哽結拘守常憲當便道之官不得束身奔走
稽顙城關瞻係天衢馳心輦轂臣不勝屏營延仰謹
拜表以聞

吊魏武帝文一首 并序

元康八年機始以臺郎出補著作游乎秘閣而見魏

武帝遺令慨然歎息傷懷者久之客曰夫始終者萬物之大歸死生者性命之區域是以臨喪殯而後悲覩陳根而絕哭今乃傷心百年之際興哀無情之意者無乃知哀之可有而未識情之可無乎棧柩之日日蝕由乎交分山崩起於朽壤亦云數而已矣然百姓怪焉者豈不以資高明之質而不免卑濁之累居常安之勢而終嬰傾離之患故夫以迴天倒日之力而不能振形骸之內濟世夷難之智而受困魏闕之下已而格乎上下者藏於區區之木光于四表者

繫于叢爾之士雄心摧於弱情壯圖終於哀志長筭屈於短日遠跡頓於促路嗚呼豈特瞽史之異闕景黔黎之怪頽岸乎觀其所以顧命冢嗣貽謀四子經國之略既遠隆家之訓亦弘又云吾在軍中持法是也至於小忿怒大過失不當效也善乎達人之謹言矣持姬女而指季豹以示四子曰以累汝因泣下傷哉曩以天下自任今以愛子託人同乎盡者無餘而得乎亡者無存然而婉孌房闈之內綢繆家人之務則幾乎密與又曰吾婕妤妓人皆著銅雀臺於臺堂

上施八尺牀總帳朝晡上脯糈之屬月朝十五日輒
向帳作妓汝等時時登銅雀臺望吾西陵墓田又云
餘香可分與諸夫人諸舍中無所不學作履組賣也
吾歷官所得綬皆著藏中吾餘衣裘可別爲一藏不
能者兄弟可共分之旣而竟分焉亡者可以勿求存
者可以勿違求與違不其兩傷乎悲夫愛有大而必
失惡有甚而必得智慧不能去其惡威力不能全其
愛故前識所不用心而聖人罕言焉若乃繫情累於
外物留曲念於閨房亦賢俊之所宜廢乎於是遂憤

慙而獻吊云爾

接皇漢之末緒值王塗之多違佇重淵以育鱗無慶
雲而遐飛運禮道以載德乘靈風而扇威摧羣雄而
電擊舉勅敵其如遺指八極以遠略必翦焉而後綏
釐三才之闕典啓天地之禁闈舉修網之絕紀紐大
音之解徽掃雲物以貞觀要萬塗而來歸丕大德以
宏覆援日月而齊暉濟元功於九有固舉世之所推
彼人事之大造夫何往而不臻將覆篲於浚谷擠爲
山乎九天苟理窮而性盡豈長算之所研悟臨川之

有悲固梁木其必顛當建安之三八實大命之所艱
雖光昭於曩載將移駕於此年惟降神之綿邈眇千
載而遠期信斯武之未受膺靈符而在茲雖龍飛於
文昌非王心之所怡憤西夏以鞠旅沂秦川而舉旗
踰鎬京而不豫臨渭濱而有疑冀翌日之云廖彌四
旬而成災詠歸塗以反旆登峭澗而竭來次洛汭而
大漸指六軍曰念哉伊君王之赫奕寔終古之所
威先天而蓋世力盪海而拔山厄奚險而弗濟敵何
強而不殘每因禍以提福亦踐危而必安迄在茲而

夢中慮際閉而無端委軀命以待難痛沒世而未言
撫四子以深念循膚體而積歎追管魄之未離假餘
息乎音翰執姬女以嘔瘁指季豹而灌焉氣衝襟以
嗚咽喙垂睫而沈瀾違率土以靜寐戢彌天乎一棺
容宏度之峻邈壯大業之允昌思居終而恤始命臨
沒而肇揚援貞吝以甚悔雖在我而不減惜內顧之
纏綿恨末命之微詳紆廣念於履組塵清慮於餘香
結遺情於婉孌何命促而意長陳法服於帷座陪窈
窕於玉房宜備物於虛器發哀音於舊倡矯威容以

赴節掩零淚而薦觴物無微而不存體無惠而不下
庶聖靈之響像想幽神之復光苟形聲之翳沒雖音
景其必藏微清絃而獨奏進脯糈而誰嘗悼總帳之
冥漠憇西陵之茫茫登雀臺而羣悲貯美目其何望
既晞古以遺累信簡禮而薄莖彼表紱於何有貽塵
謗於後王嗟大戀之所存故雖哲而不忘覽遺籍以
慷慨獻茲文而悽傷

弔蔡邕文

彼洪川之方割豈一簣之所堙故尼父之惠訓智必

愚而後賢諒知道之已妙曷信道之未堅忽甯子之
保已效萇叔之違天冀澄河之遠日忘朝露之短年

吳大帝誄

我皇明明固天寔生體和二合以察三精濯暉育慶
懷祥載榮率性而和因心則靈厥靈伊何克聖克仁
茂對四象克配乾坤齊明日月考詳鬼神誕自幼冲
獻哲宿照甄化無形探景絕曜巍巍聖姿文武既俊
有覺德徽兆民欣順將熙景命經營九圍登跡岱宗
班瑞舊圻上玄匪惠早零聖暉神廬既考史臣獻貞

龍輻啓殞霄載紫庭辰旒飛藻凶旗舉銘崇華熠爍
翠蓋繁纓千乘結四萬騎重營蕭鼓振響和鑿流聲
動軫閭闔永背承明顯步萬官幽驅百靈隨化太素
卽宮杳冥億兆同慕泣血如零

愍懷太子誄

明明皇子成命旣駿保又皇家載生淑胤茂德克廣
仁姿朗雋當克無疆光紹有晉如何不吊暴離咎艱
曾是遘愆匪降自天肇傾運祚遂喪華年嗚呼哀哉
沉雲旣祛日月增暉靈寵可贈冤魂難追舊物東友

靈樞西歸傷我惠后寂焉翳滅銜哀駿奔凶服就列
追慕微塵興言斷絕敢誄遺風庶存芳烈其辭曰
巍巍皇基奕奕紫微有命旣集天祿永綏篤生太子
纂德承茂平紹大烈時惟洪胄奇穎發翹清藻在秀
誕自幼蒙逮事武皇展矣太子播此瓊芳允矣聖祖
無言不臧婉孌乘輿各裕德昌龍集庚戌日月改度
赫赫明明我皇登祚厥登伊何皇統是荷華綬重采
翠蓋垂葩鸞旗阿那王衡吐和聿來在宮體亮而誠
肅雍皇極思媚紫庭亦旣涉學遵師盛道何年之妙

而察之早讜言必復乖義則考惟天有命太子膺之
惟皇有慶太子承之當究遐年登茲胡耆緝熙有晉
克構帝宇如何晨牝穢我朝聽仰索皇家惟臣明聖
惴惴太子終溫且敬銜辭卽罪掩淚祇命顯加放流
潛肆鳩毒痛矣太子乃離斯酷謂天蓋高訴哀靡告
鞠躬引分顧景摧剥嗚呼哀哉凡民之喪有戚有姻
太子之歿傍無昵親跼蹐嚴宮絕命禁闈幽樞偏寄
孤魂曷歸嗚呼太子生冤歿悲匹夫有怨尚或殞霜
矧乃太子萬邦攸望普天扼■率土懷傷精感六沴

咎徵紫房爰茲元輔啓我今圖王赫斯怒天誅靡遺
攬搶叱掃元凶服辜仁詔引咎哀策東徂先復寵祚
紹建藐孤於時暉服粲焉畢陳庭旅舊物堂有故臣
孰云太子不見其人嗚呼哀哉旣濟洛川靈旆左迴
三軍悽裂都邑如隕慨矣寤歎念我愍懷

吳貞獻處士陸君誄

我聞有命天祿有秩如斯古人而有斯疾兄弟之恩
離形合氣矧我與君年相亞逮綢繆之遊自矇及朗
孩不貳音抱或同襁撫髻並育携手相長行焉比跡

誦必共響庶君偕老靈根克固附翼雲霄雙飛天路
人皆年長君獨短祚穀則同朝遊矣先墓

吳丞相江陵侯陸公誄

根條伊何苗黃裔舜長發有祥貽我作亂劉王負險
寇我西隣公侯赫怒干戈啓陳金鉞鏡日雲旗降文
元玉墮難鯨鯢墜鱗戎漠時殪方域清塵

吳大司馬陸公誄

我公承軌高風肅邁明德繼體徽音奕世昭德伊何
克俊克仁德周能事體合機神禮交徒候敬睦白屋

陸曲躬吐食揮沐爰及鰥寡賑此惇獨孚厥惠和
脫驂分祿乃命我公誕作元輔位表百辟名茂羣后
因是荆人造我寧宇備物典策主冠及斧龍旂飛藻
靈鼓樹羽質文殊塗百異行徹人玩其華鮮識其實
於穆我公因心則哲經綸至道終始自結德與行滿
美與言溢

吳大司馬陸公少女哀辭

冉冉晞陽不遂其茂暉暉芳華彫芳落秀遵堂涉室
髣髴興想人皆有聲爾獨無響

陸士衡集卷九
晉劉處士參妻王氏夫人誄

猗猗嘉穎朝陽方翹烈風嚴霜殞此秀條璇璣倏忽
四序競征清商激宇蟋蟀吟櫺

陸士衡文集卷第十

晉 吳郡陸 機著

明 新安汪士賢校

大田議

臣聞隆名之主不改法而下治陵夷之世不易術而
民怠夫商人逸而利厚農人勞而報薄導農以利則
耕夫勤節商以法則游子歸

辨亡論上

昔漢氏失御姦臣竊命禍基京畿毒徧宇內皇綱弛

秦王室遂卑於是羣雄蜂駭義兵四合吳武烈皇帝
慷慨下國電發荆南權略紛紜忠勇伯世威稜則夷
昇震盪兵交則醜膚授馘遂掃清宗祊蒸裡皇祖于
時雲興之將帶州颺起之師跨邑哮闌之羣風驅熊
羆之衆霧集雖兵以義合同盟戮力然皆苞藏禍心
阻兵怙亂或師無謀律喪威稔寇忠規武節未有如
此其著者也武烈既沒長沙桓王逸才命世弱冠秀
發招攬遺老與之述業神兵東驅奮寡犯衆攻無堅
城之將戰無交鋒之虜誅叛柔服而江外底定飭法

脩師則威德翕赫賓禮名賢而張昭爲之雄交御豪
俊而周瑜爲之傑彼二君子皆弘敏而多竒雅達而
聰哲故同方者以類附等契者以氣集而江東蓋多
士矣將北伐誅華誅鉏于紀旋皇輿於夷庚及帝以
乎紫闥挾天子以令諸侯清天步而歸舊物戎車旣
次羣凶側目大業未就中世而殞用集我大皇帝以
竒蹤襲於逸軌睿心因於令圖從政咨於故實播憲
稽乎遺風而加之以篤固申之以節儉疇咨俊茂好
謀善斷束帛旅於丘園旌命交於塗巷故豪彥尋聲

陸士衡集卷十
而響臻志士希光而景鶩異人輻輳猛士如林於是
張昭爲師傳周瑜陸公魯肅呂蒙之疇入爲腹心出
作股肱甘寧凌統程普賀齊朱桓朱然之徒奮其威
韓當潘璋黃蓋蔣欽周泰之屬宣其力風雅則諸葛
瑾張承步騭以名聲光國政事則顧雍潘濬呂範呂
岱以器任幹職奇偉則虞翻陸績張溫張惇以諷議
舉正奉使則趙咨沈珩以敏達延譽術數則吳範趙
達以機祥協德董襲陳武殺身以衛主駱統劉基強
諫以補過謀無遺譖舉不失策故遂割據山川跨制
荆吳而與天下爭衡矣魏氏常籍戰勝之威率百萬
之師浮鄧塞之舟下漢陰之衆羽楫萬計龍躍順流
銳騎千旅虎步原隰謨臣盈室武將連衡喟然有吞
江滸之志一宇宙之氣而周瑜驅我偏師黜之赤壁
喪旗亂轍僅而獲免收跡遠遁漢王亦憑帝王之號
帥巴漢之民乘危騁變結壘千里志報關羽之圖收
湘西之地而陸公亦挫之西陵覆師敗績困而後濟
絕命永安續以濡湏之寇臨川摧銳蓬籠之戰子輪
不反由是二邦之將喪氣挫鋒勢剝財匱而吳莞然

坐乘其弊故魏人請好漢氏乞盟遂躋天號鼎峙而
立西屠庸益之郊北裂淮漢之涘東包百越之地南
括羣蠻之表於是講八代之禮蒐三王之樂告類上
帝拱揖羣后虎臣毅卒循江而守長棘勁鏃望飈而
奮庶尹盡規於上四民庶業於下化協殊裔風衍遐
圻乃俾一介行人撫巡外域巨象逸駿擾於外閑明
珠瑋寶耀於內府珍瑰重跡而至奇玩應響而赴輶
軒騁於南荒衝軻息於朔野齊民免干戈之患戎馬
無晨服之虞而帝業固矣大皇旣沒幼主蒞朝姦回

肆虐景皇聿興虔修遺憲政無大闕守文之良主也
降及歸命之初典刑未滅故老猶存大司馬陸公以
文武熙朝左丞相陸凱以謇諤盡規而施績范慎以
威重顯丁奉離斐以武毅稱孟宗丁固之徒爲公卿
樓玄賀邵之屬掌機事元首雖病股肱猶存爰及末
葉羣公旣喪然後黔首有瓦解之志皇家有土崩之
釁曆命應化而微王師躡運而發卒散于陣民犇于
邑城池無藩籬之固山川無溝阜之勢非有工輸雲
梯之械智伯灌激之害楚子築室之圍燕人濟西之

隊軍未浹辰而社稷夷矣雖忠臣孤憤烈士死節將
奚救哉夫曹劉之將非一世所選向時之師無曩日
之衆戰守之道抑有前符險阻之利俄然未改而成
敗貿理古今詭趣何哉彼此之化殊授任之才異也

辨亡論下

昔三方之王也魏人據中夏漢氏有岷益吳制荆揚
而奄交廣曹氏雖功濟諸粵虐亦深矣其民怨矣劉
公因險以飾智功已薄矣其俗陋矣夫吳桓王基之
以武太祖成之以德聰明厭達懿度弘遠矣其求賢

如不及恤民如稚子接士盡盛德之容親仁罄丹府
之愛拔呂蒙於戎行識潘濬於係虜推誠信士不恤
人之我欺量能授器不患權之我偏執鞭鞠躬以重
陸公之威悉委武衛以濟周瑜之師卑宮菲食以豐
功臣之賞披懷虛已以納謨士之算故魯肅一面而
自托士燮蒙險而致命高張公之德而省游田之娛
賢諸葛之言而割情欲之歡感陸公之規而除刑法
之煩奇劉基之議而作三爵之誓屏氣跼蹐以伺子
明之疾分滋損甘以育凌統之孤登壇慷慨歸魯子

陸士衡集卷十
之功削投惡言信子瑜之節是以忠臣競盡其謀志
士咸得肆力洪規遠略固不厭夫區區者也故百官
苟合庶務未遑初都建業羣臣請備禮秩天子辭而
不許曰天下其謂朕何宮室輿服蓋慊如也爰及中
葉天人之分既定百度之闕粗修雖醲化懿綱未齒
乎上代抑其體國經民之具亦足以爲政矣地方幾
萬里帶甲將百萬其野沃其兵練其器利其財豐東
負滄海西阻險塞長江制其區宇峻山帶其封域國
家之利未巨有弘於茲者矣借使中才守之以道善

人御之有術敦率遺典勤民謹政循定策守常險則
可以長世永年未有危亡之患也或曰吳蜀唇齒之
國蜀滅則吳亡理則然矣夫蜀蓋藩援之與國而非
吳人之存亡也何則其郊境之接重山積險陸無長
轂之徑川阨流迅水有驚波之艱雖有銳師百萬啓
行不過千夫舳艫千里前驅不過百艦故劉氏之伐
陸公喻之長蛇其勢然也昔蜀之初亡朝臣異謀或
欲積石以險其流或欲機械以御其變天子總群誼
而諮之大司馬陸公公以四瀆天地之所以節宣其

氣固無可遏之理而機械則彼我之所共彼若棄長
技以就所屈則荆揚而爭舟楫之用是天贊我也將
謹守峽口以待禽耳逮步闡之亂憑寶城以延強寇
重資幣以誘羣蠻于時大邦之衆雲翔電發懸旌江
介築壘遵渚襟帶要害以止吳人之西而已漢舟師
沿江東下陸公以偏師三萬北據東坑深溝高壘案
甲養威反虜踈跡待戮而不敢北窺生路強寇敗績
宵遁喪師太半分命銳師五千西禦水車東西同捷
獻俘萬計信哉賢人之謀豈欺我哉自是烽燧罕警

封域寡虞陸公沒而潛謀兆吳釁深而六師駭夫太
康之役衆未盛乎曩日之師廣州之亂禍有愈乎向
時之難而邦家顛覆宗廟爲墟嗚呼人之云亡邦國
殄瘁不其然歟易曰湯武革命順乎天玄曰亂不極
則治不形言帝王之因天時也古人有言曰天時不
如地利易曰王侯設險以守其國言爲國之恃險也
又曰地利不如人和在德不在險言守險之由人也
吳之興也參而由焉孫卿所謂合其參者也及其亡
也恃險而已又孫卿所謂捨其參者也夫四州之萌

非無衆也大江之南非乏後也山川之險易守也勁
利之器易用也先政之策易循也功不興而禍違者
何哉所以用之者失也是故先王達經國之長規審
存亡之至數謙已以安百姓敦惠以致人和寬冲以
誘俊乂之謀慈和以結士民之愛是以其安也則黎
元與之同慶及其危也則兆庶與之共患安與衆同
慶則其危不可得也危與下共患則其難不足恤也
夫然故能保其社稷而固其土宇麥秀無悲殷之思
黍離無愍周之感矣

五等諸侯論

夫體國經野先王所慎創制垂基思隆後葉然而經
略不同長世異術五等之制始於黃唐郡縣之治創
自秦漢得失成敗備在典謨是以其詳可得而言夫
先王知帝業至重天下至曠曠不可以偏制重不可
以獨任任重必於借力制曠終乎因人故設官分職
所以輕其任也並建五長所以弘其制也於是乎立
其封疆之典財其親踈之宜使萬國相維以成盤石
之固宗庶雜居以定維城之業又有以見綏世之長

御識人情之大方知其為人不如厚已利物不如圖
身安上在於悅下爲已在乎利人故易曰悅以使民
民忘其勞孫卿曰不利而利之不如利而後利之之
利也是以分天下以厚樂而已得與之同憂饗天下
以豐利而我得與之共害利博則恩篤樂遠則憂深
故諸侯享食土之實萬國受世及之祚矣夫然則南
面之君各務其治九服之民知有定主上之子愛于
是乎生下之體信於是乎結世治足以敦風道衰足
以禦暴故強毅之國不能擅一時之勢雄俊之士無

所寄霸王之志然後國安由萬邦之思治主尊賴群
后之圖身譬猶衆目管方則天網自相四體辭難而
心膂獲又三代所以直道四王所以垂業也夫盛衰
隆敝理所固有教之廢興繫乎其人愿法期於必涼
明道有時而闇故世及之制敝於強禦厚下之典漏
於末折侵弱之豐違自三季陵夷之禍終于七雄昔
者成湯親照夏后之鑒公且目涉商人之戒文質相
濟損益有物故五等之禮不革于時封畛之制有隆
焉爾者豈玩二王之禍而闇經世之算乎固知百世

非可懸御善制不能無敝而侵弱之辱愈於殄祀土崩之困痛於陵夷也是以經始權其多福慮終取其少禍非謂侯伯無可亂之符郡縣非致治之具也故國憂賴其釋位主弱憑其翼戴及承微積敝王室遂卑猶保名位祚垂後嗣皇統幽而不輟神器否而必存者豈非事勢使之然歟降及亡秦棄道任術懲周之失自矜其得尋斧始於所庇制國昧於弱下國慶獨饗其利主憂莫與其害雖速亡起亂不必一道顛沛之釁實由孤立是蓋思五等之小怨忘萬國之大

德知陵夷之可患閭土崩之爲痛也周之不兢有自來矣國之今主十有餘世然片言勤王諸侯必應一朝振矜遠國先叛故強晉收其請隧之圖暴楚頓其觀鼎之志豈劉項之能闕關勝廣之敢號澤哉借使秦人因循周制雖則無道有與共弊覆滅之禍豈在曩日漢矯秦枉大啓侯王境土踰溢不遵舊典故賈生憂其危晁錯痛其亂是以諸侯阻其國家之富憑其士民之力勢足者反疾土狹者逆遲六臣犯其弱綱七子衝其漏網皇祖夷於黥徒西京病於東帝是

蓋過正之災而非建侯之累也然呂氏之難朝士外
顧宋昌策漢必稱諸侯逮至中葉忌其失節割削宗
子有名無實天下曠然復襲亡秦之軌矣是以五侯
作威不忌萬邦新都襲漢易於拾遺也光武中興纂
隆皇統而猶遵覆車之遺轍養喪家之宿疾僅及數
世姦軌充斥卒有強臣專朝則天下風靡夫縱橫
則城池自夷豈不危哉在周之衰難興王室放命者
七臣于位者三子嗣王委其九鼎凶族據其天邑征
鼙震於閩宇鋒鏑流乎絳闕然禍止畿甸害不覃及

天下晏然以治待亂是以宣王興於共和襄惠振於
晉鄭豈若二漢階闔暫擾而四海已沸孽臣朝入而
九服夕亂哉遠惟王莽篡逆之事近覽董卓擅權之
際億兆悼心愚智同痛然周以之存漢以之亡夫何
故哉豈世乏曩時之臣士無匡合之志歟蓋遠續屈
於時異雄心挫於卑勢爾故烈士扼腕終委寇讎之
手中人變節以助虐國之桀雖復時有鳩合同志以
謀王室然上非與主下皆市人師旅無先定之班君
臣無相保之志是以義兵雲合無救劫弑之禍民望

未改而已見大漢之滅矣或以諸侯世位不必常全昏主暴君有時比跡故五等所以多亂今之牧守皆以官方庸能雖或失之其得固多故郡縣易以爲治夫德之休明黜陟日用長率連屬咸述其職而淫昏之君無所容過何則其不治哉故先代有以之興矣苟或衰陵百度自悖鬻官之吏以貨準才則貪殘之萌皆如羣后也安在其不亂哉故後王有以之廢矣且要而言之五等之君爲已思治郡縣之長爲利圖物何以徵之蓋企及進取仕子之常志修已安民良士之所希及夫進取之情銳而安民之譽遲是故傷百姓以利已者在位所不憚損實事以養名者官長所夙夜也君無卒歲之圖臣挾一時之志五等則不然知國爲已士衆皆我民民安已受其利國傷家嬰其病故前人欲以垂後後嗣思其堂構爲上無苟且之心羣下知膠固之義使其並賢居治則功有厚薄兩愚處亂則過有深淺然則探八代之制幾可以一理貫秦漢之典殆可以一言救矣

晉平西將軍孝侯周處碑

君諱處字子隱義興陽羨人也氏胄曩興煥乎墳典
華宗往茂鬱其簡書啓三十之洪基源流定鼎運八
百之遠祚枝葉封桐軒蓋列於漢庭蟬冕播於陽羨
二南之價傳不朽而紛敷大護之音聲無徵而必顯
山高海濶其在斯焉祖賓少折節早亡吳初召諮議
參軍舉郡上計轉爲州辟從事別駕步兵校尉光祿
大夫廣平太守父魴少好學舉孝廉吳寧國長奮威
長史懷安錢塘縣侯丹陽西部屬國都節校尉
拜裨將軍三郡都督太中大夫臨川豫章鄱陽太

晉故散騎常侍新平廣漢二郡太守封關內侯眷綬
揚名臺閣標著風化之美奏課爲能亭亭孤美灼灼
橫劭徇高位於生前思垂名於身後遂以罕言不違
應期出輔洋洋之風俯冠來葉巍巍之盛仰繼前賢
君乃早孤不弘禮制年未弱冠膂力絕於天下妙氣
挺於人間騎獵無疇時英式慕縱情寡偶俗弊不忻
鄉曲誣其害名改節播其聲譽遂來吳事余厥弟謹
然受誨向道朝聞方勵志而淫詩書便好學而尋子
史文章綺合藻思羅開吳朝州縣交辟太子洗馬東

觀左丞中書右丞五官郎中左右國史靖恭夙夜恪
居官次遷大尚書僕射東觀令太常卿無難督斥熙
庶績朝廷謐寧使持節大都督塗中京下諸軍事封
章浦廷侯國猶多士君實得賢汪洋廷闕之傍昂藏
寮案之上射獸功猶見顯刺蛟名乃遠揚忠列道自
克修義節情還永布琳瑯梓杞珪璧棟梁君著默語
三十篇及風土記并撰吳書於是吳平入晉王渾登
建業宮釀酒既酣乃謂君曰諸人亡國之餘得無戚
乎君對曰漢末分崩三方鼎立魏滅於前吳亡於後

亡國之戚豈惟一人渾乃大慙任晉稍遷總統初入
拜諮議郎除討虜護軍新平太守撫和戎狄叛羗歸
附雍士美之轉爲廣漢太守郡多滯訟有經三十年
不決者處以評其枉直一朝決遣以母年老罷歸尋
除楚內史未之官徵散騎常侍處曰古人辭大不辭
小乃先之楚而郡旣經喪亂新舊雜居風俗未一處
敦以教義又檢尸無主及白骨在野收而葬之然以
就徵遠近稱嘆及居近侍多所規諷遷御史中丞正
繩直筆凡所糾劾不避寵戚梁王彤違法處深文案

之及吳人齊萬年反朝臣惡其強直皆曰處吳之名將子也忠烈果毅庶僚振肅英情天逸遠性霞騫陝北留棠遂有二天之詠荆南度虎猶標十部之書尋轉散騎常侍輕車將軍迴輪出於新年士女揮淚褰帷望於廣漢雞犬靡喧振茲威略宣其惠和晉京遥仰部從迎欽是時互賊作逆有衆七萬屯於梁山朝廷推賢以君才兼文武詔授建威將軍以五千兵奉辭西討忠槩盡節不顧身命乃賦詩曰去去世事已策馬觀西戎藜藿甘梁黍期之克令終言畢而戰自

旦及暮斬首萬級絃絕矢盡番系不救左右勸退
按劍怒曰此是吾効節授命之日何以退爲大臣以身殉國不亦可乎韓信背水之軍未遑得喻工輪縈帶之勢早擬連蹤莫不梯山架壑襁負來歸戎士杆其封塲農人展其耕織秋風才起追戰虜於雷霆春水方生揮鍤同於雲雨立功立事名將名臣者乎元康九年回灰增加奄捐館舍春秋六十有二天子以大臣之葬師傅之禮親臨殯壤建武元年冬十一月甲子追贈平西將軍封清流亭侯謚曰孝禮也賜錢

陸士衡集卷第十
十五
百萬葬地一頃京城地五十畝爲第又賜王家田五頃詔曰處母年老加以逆旅遠人朕每憫念給其醫藥酒米賜以終年以太興二年歲在己卯正月十日塋於義興舊原南瞻荆岳崇峻極之巍巍北睇蛟川濬清流之澄澈娶同郡盛氏有四子靖玘札頌並皆志性純孝過禮喪親墳前之樹染淚先枯庭際之禽聞悲乃下遂作銘曰

周南著美岐山表靈葉繁漢室枝茂晉庭皎皎夫子奇特播名幼有異行世存風烈早馳問望晚懷耿節頗尚豪雄昇名禁闕捨爵策勲允歸明哲輝赫大晉封豕多故式揚廟畧克清天步海濱旣折江淮並泝漢水作藩條章斯布俗歌揆日人謠何暮忠貞作相追蹤絳侯將亭嘉茂遽掩芳猷潛光陽旬返旆吳丘舊關雖入鄉路冥浮鑄茲幽石萬代千秋

陸士衡集卷第十終

士衡集十卷宋慶元中嘗刻華亭
縣齋歲久其書不傳余家舊有藏
本吳士陸元大為重刻之士衡與其
弟士龍並以文章名世人稱之俊張
司空華嘗謂之曰人患才少子患
其多葛稚川亦稱其文猶玄圃之

積玉五河之吐流及觀之史則三遠
超枚馬高躡王劉百代文宗一人而
已其贊士衡抑又必矣士衡之文嘗
載蕭氏文選然特十之一二是集復
行使學者得盡窺古人述作而效
法之此誠斯文之幸而亦豈非與學者

之幸哉

正德己卯夏六月太僕少卿都穆
記

公

因察門外風土已不勝言

此物數

